

Rom

Pol Rom bin bi kirop mij ñu kil tikak

Pol Rom bin bi kirop mij ñu kil tikak

1 ¹Yad Pol. Krajs Jisas wög gi ñeb bi ne midebin. God yip ag lek, Krajs Jisas minim tep dad ameb bi alap midebin. God ne yip dek, God minim tep ak dad ajpin. ²Pen minim tep nibak, God birarik nep bi minim agep ne okok kirop agek, kiri God Minim ak Minim Siñ ak ñu kil tikil aglak rek nep gak. ³Minim Siñ ñu kil tikil aglak nibak, kiri God Ñi ne minim ak nep aglak. Karip lim ar wagin aul lak ak, bi nak Depid tikek, tik dam dapil gil, nop tik dolak. ⁴Pen ne ke God, ne ke bi siñ yib, ne kimil warikak ak me, kilis ke yib nibak niñil nipin, ne God Ñi ne yib, Bi Kib cin Jisas Krajs.

⁵Jisas Krajs yip yimig niñil di tep gak. Jisas Krajs yib ne ar amnañ, agil, God bi okok abe yip abe ag lil agak, nibi lim dai okok tigoñ tigoñ bin bi magilsek yib kirop Jisas minim tep ag ñem, kiri minim tep nibak niñ dil, ageb rek nep ginimel, agak. ⁶Pen nibi Rom bin bi midebim siñak, God nibep ak rek nep Jisas Krajs bin bi ne ke ag lak.

⁷Nib ak, nibep Rom kai, God, bin bi yad midelañ, agil, di midmagil yib lip okok, nibep mij aul ñu kil tikebin. Bapi God, Bi Kib Jisas Krajs, nibep di tep gil, kod mid tep ger me, nibi kapkap mid tep ginimib.

Pol taun kib Rom amnin, agil, gos ak niñak

⁸Minim ned agnig gebin ak, nibi Jisas Krajs niñ dipim ak, bin bi karip lim gol pis pis okok magilsek kesim nibak niñil agel ameb. Nib ak, yad Jisas Krajs nop sobok gil, God nop tep agebin. ⁹⁻¹⁰Yad God Ñi ne minim tep ak, gos ar nokim ak nep niñil kilis gil, ag ñi ajil, God nop wög gebin. God ne niñip, yad nop sobok gil, per nep yib nibep agebin. God ne kanib yikek, nibi midebim siñak am niñnigain, agil, nop sobok gebin.

¹¹Jisas minim tep ne ognap nibep ag ñen, God Kaun ne kaun nibep tap tep alap ñek, kaun nibep nab adañ kilis midenimib, agil, nibi midebim siñak am niñnim, agil gos ak per niñebin. ¹²Pen ar nibak nep mer. Yad onigain ak, yad Jisas Kraiss niñ dipin rek niñil, nibi kaun nibep nab adañ kilis dil, Jisas Kraiss nop niñ di kilis yib ginigabim. Pen nig aknib rek, nibi Jisas Kraiss niñ dipim rek niñil, yad ak rek nep kaun yad nab adañ kilis dil, Jisas Kraiss nop niñ di kilis yib ginigain.

¹³Ai mam sikop. Yad nibep am niñnim, agil, gos ak per nipin ak pen kanib ma midek. Amil, Jisas Kraiss minim tep ak ag ñen, nibi minim tep ak niñil, ageb rek nep niñ dil, Jisas Kraiss nop niñ dem, ne nibep tig asik yoknimin, ag gos nipin. Lim dai ke ke okok, bin bi ognap nab kirop okok ginek rek, am nab nibep siñak ak rek nep gipnep.

¹⁴Pen Jisas Kraiss yip di komiñ yokak ak me, yad gos nipin yad tap dai mideb. Yad bin bi okok minim tep ne ak ag ñinim. Grik bin bi okok abe, Grik bin bi mer okok abe, bin bi ñu kil nipal okok abe, bin bi ñu kil ma nipal okok abe, kirop magilsek minim tep ne ak ag ñinim, agil, gos ar ak nipin. ¹⁵Nib ak me, yad nibi taun kib Rom midebim siñak ak rek nep, am Jisas minim tep ak nibep ag ñinim, agil, gos nokim ak nep nipin. ¹⁶Jisas Kraiss minim tep ne ak God kilis sek ageb ak me, bin bi minim nibak niñ denigal ak, minim tep nibak kirop tig asik yoknigab; Juda bin bi okok abe, Juda bin bi mer okok abe, kirop magilsek tig asik yoknigab. Nib ak, yad Jisas minim tep ne ak gos niñil, gos sek nep midebin. ¹⁷Jisas minim tep ak niñil nipin, God ne titi gil bin bi tap si tap timel gipal okok kirop bin bi tep yad, agnigab. Bin bi okok kiri gi tep gipal ak niñil, God kirop bin bi komiñ tep yad, ma agnigab; kiri Jisas minim tep ak niñ dipal ak niñil, kirop bin bi komiñ tep yad, agnigab. Ar nibak nep, God Minim ñu kil tikil aglak, “Bin bi God Minim ageb rek niñ dinigal okok, God kirop bin bi tep yad, agek, kiri komiñ yib midenigal,” agak.

Bin bi Jisas Kraiss nop ma niñ dinigal okok minim kib niñnigal

¹⁸Bin bi God Minim niñid niplap ak pen bin bi ognap God nop gos ma niñil, gi timel gil, God Minim niñid ak pak karikpal. Nib ak me, God ne kal juil, kirop minim kib agnig geb. ¹⁹God ne tipeg Bi rek mideb ak, ne ke miseñ lek nipal. ²⁰Ne birarik ped okok lim dai aul gi lak ñin ak tikek, ne God kilis sek yib per per mideb ak miseñ midek nipal. God ne tap tari tari gi lak okok nep niñil, ne tipeg Bi rek mideb ak niplap. Ma niñenigal ak, tap kiri. ²¹Nib ak, God nop nipal ak pen nop tep agil, yib nop ak agel ar ma amib. Gos abramek niñil, saköl ñagil, kislím gip okok rek midebal. ²²Cin bin bi gos tep niñobin, apal ak pen kiri bin bi saköl rek midebal. ²³God per mideb ak nop saköl gil, tap yokop ognap dil, bin bi rek gi lil, kimin yakir rek gi lil, soiñ sarau rek gi lil, tap nib okok, god cin, agil, sobok gipal. ²⁴Nig gel, God kirop kirig gek, kiri gos timel yib niñil, bin si bi si gil, nag timel ar nibak amil, mib goñ kiri ke gi timel gipal.

²⁵ God Minim niñid ak kirig gil, minim esek niñ dipal. God tap gi lak okok nep sobok gil, ne tap gi lak okok nep yib agel ar amib. Pen God ne tap magilsek gi lak ak, yib nop nep agel ar ambkop. Yib nop nep per per nep agon ar amnañ. Nib akniñ rek tep.

²⁶ Kiri nig gilig gi timel yib gelak ak me, God kirop kirig gek, tap nabini yib gip ar ak nep gi midebal. Bin okok, bi yipid gil di midep rek kirig gil, bin ognap eip nag timel ar ognap gipal. ²⁷ Bi okok ak rek nep, bin yipid gil di midep rek kirig gil, bi alap bi alap nop niñek mab rek yinek, bi okok miñ goñ kirop ke nep gi timel yib gipal. Nig gil pen yur dipal.

²⁸ Kisen God minim ma niñnigabin, agil, gos niñlak ak me, God kirop kirig gek, tap timel tap ma gep kirop midmagil pilis gi ñeb okok nep gipal. ²⁹ Pen kirop tap timel gep ar ak gos nokim ak nep lek, kiri timel yib nep gilig gi, tap okok cin nep mideñ, agil, gos ak niñlig gi, abramek gi timel gilig gi, gipal. Bin bi tap tep kiri okok cin rek ma lip, agil, gos timel niñil, cip ñagil, pen pen gil, esek agil, gos timel nep nipal. Pen, nep agip yip agip, agil, ³⁰ bin bi ag juil, God nop milik kal niñil, bin bi ag sikol gil, cin nep bin bi kib ag gos niñlan, agil, yib kiri ak ke dap ranbal. Gos kisen niñ ar ognap niñil gi timel gin, agil, gos kiri niñak nep nipal. Nonim nap minim apal ak tiñ jupal. ³¹ Kiri gos timid ma lip. Minim ke ag lipal ar ak kisen ma gipal. Ñi pai amilgon apilgon kiri ke okok midmagil ma lipal. Bin bi ognap kirop niñel, yimig ma gip. ³² Gipal niñak, God mer agek yur kib dep ak nipal ak pen kiri ke gil aka bin bi ognap eip gil, ak gi tep gipin, agil apal.

God minim kib agil, minim yipid gil nep tig bilokniñab

2 ¹ Pen nibi bin bi ognap kirop ag juil agniñabim, “Bin bi okok tari ginig tap si tap timel gipal,” agniñabim ak pen nibi ke ak rek nep gipim ak me, God niñil niñep minim kib agenigab ak, nibi abe minim pen agniñabim rek ma linigab. ² Cin niñin, God ne minim niñid nep ageb. Nib ak, bin bi nig akniñ rek ginigal okok, kirop minim kib agniñab ak, minim yipid gil nep agniñab. ³ Bin bi tap si tap timel gipal okok, agil, ag juñigabim ak pen nibi ke ak rek nep gipim. Nib ak, nibi gos tari niñim? God cinop minim kib ma agniñab, agil niñim ar? ⁴ God bi tep, niñep bin bi per yimig yib niñil, kapkap sain tik damil, kasek kal ma gip ak niñem, ne bi yokop alap rek lip ar? Pen niñim! Ne kapkap sain tik mideb ak, yad kasek kal ma jueniñain, kiri tap si tap timel gipal okok, tari ginig nig gipin, agil, kirig ginimel, agil, kapkap sain tik mideb. ⁵ Pen God kapkap sain tik midil kasek kal ma gip ak, nibi tap si tap timel gipim ak, tari ginig nig gipin, agil, ma kirig gipim. Nibi minim ne yo niñil, tap si tap timel gipim okok nep gilig gi midebim. Nib ak, God bin bi gipal gipal rek niñil, minim kib agniñab ñin ak, nibi minim kib yib niñnigabim. Ñin niñak, ne minim kib agil, yipid gil nep agniñab ak, misen niñnigal. Tap si tap timel

gipim ak, ne niñil kal juil nibep yur pen ñinigab. ⁶“Bin bi nokim nokim gipal gipal rek niñil, God kirop ak rek nep nokim nokim pen ñinigab.”

⁷Ñin nibak bin bi an an, God cinop melik tep ne ñil, minim tep agil, komiñ per midep magil ak ñinigab, agil, bin bi ognap kirop per per gi tep gipal okok, God kirop komiñ per midep magil ak ñinigab. ⁸Pen bin bi an an, tap miñ goñ kiri ke nep gos niñil, nag tep ar nibak yo niñil, nag timel ar ak gel amñigab okok, God kirop niñek miñik yib yapek, kal juil, yur kib yib ñinigab.

⁹Pen Juda bin bi okok abe, Juda bin bi mer okok abe, nag timel ar ak gel amenigab ak, God kirop minim kib agek, kiri magilsek koslam midlig gi, gos par yib niñlig gi, gi midenigal. ¹⁰Pen Juda bin bi okok abe, Juda bin bi mer okok abe, gi tep genigal ak, God kirop magilsek melik tep ne ñil, minim tep agil, di tep gek, mid tep ginigal. ¹¹Tari ginig: God ne pis kid aka pis kid ma amñigab. Yipid gil nep niñil, bin bi okok kirop tig asik ke ke linigab.

¹²Juda bin bi mer okok, lo Mosis agak ma nipal okok, tap si tap timel genigal ak, lo minim ma nipal ak pen kiri kariñ lim timel amñigal. Pen bin bi lo Mosis agak nipal okok, tap si tap timel genigal ak, God lo minim nibak dil, kirop minim kib agñigab. ¹³Bin bi lo minim nipal okok, God kirop, bin bi tep yad, agil ma agñigab. Bin bi lo minim ageb rek nep ginigal okok nep, God kirop, bin bi tep yad, agñigab. ¹⁴Juda bin bi mer okok lo Mosis agak ma nipal. Pen kiri gos kiri ke niñil, lo minim ageb rek genigal ak, gos magil kiri ke lo rek mideb. ¹⁵Kiri nig gil gos niñil gipal ak me, cin niñil nipin, lo minim ak nab kiri adañ mideb. Ñin ognap gi damil, nab kiri eyañ, “Gi timel gobin,” agil nipal. Pen ñin ognap gi damil, nab kiri eyañ, “Gi tep gobin,” agil nipal.

¹⁶Jisas Krais minim tep ag ñi ajpin ak ageb, minim kib agep ñin ak, God Jisas Krais nop agek, bin bi tap si tap timel we gil gipal okok ag yik miñeñ lek, ne gos won kiri ke midmagil nab kiri adañ tari tari agip ak niñil, kirop minim kib agñigab.

**God ne lo minim cinop ñak ak me, cin Juda
kai bin bi ne ke yib midobin, aglak**

¹⁷Pen nibi Juda bin bi okok, yib nibi ke dap ranlig gi apim, “God ne lo minim cinop ñak ak me, bin bi ne ke yib midobin. ¹⁸Cin lo minim nipin ak me, nag ar nibak tep, nag ar nibak timel, ag gos niñil, God nop tep gip ar ak nep gipin,” apim. ¹⁹Pen minim ar alap apim, “Bin bi ma nipal okok kirop ag ñi tep gil, bin bi uñin kwoi gek kislim gip rek midebal okok kirop ag ñi tep gil, ²⁰bin bi lo minim ma nipal okok kirop ag ñi tep gil, ñi pai sikol okok kirop ag ñi tep gil gipin,” apim. Apim nibak, apim, “God ne lo minim cinop ñak ak me, gos tep magilsek abe, gos niñid magilsek abe bir nipin,” apim.

²¹Nibi lo minim ak niñil, bin bi okok kirop ag ñibim ak pen minim bin bi okok ag ñibim rek nibi ke ma gipim. Bin bi ognap kirop apim, “Tap si ma dinimib,” apim ak pen nibi ke tap si dipim aka? ²²Bin bi ognap kirop apim, “Bin si bi si ma ginimib,” apim ak pen nibi ke nig gipim aka? Bin bi ognap kirop apim, “Tap abramek okok God rek ma sobok ginimib,” apim ak pen karip sobok gipal migan nib okok amil, tap dap lipal okok ognap si dipim aka?

²³Yib nibi ak ke dap ran lil apim, “God lo ak cinop Juda bin bi ñak,” apim ak pen minim ne ak tib jupim rek, yib ne ak rek nep ag jupim aka? ²⁴Gi timel gipim nibak, bi alap ned God Minim ñu kil tikil agak rek nep gipim. Ne agak,

“Nibi Juda bin bi, God lo minim nipin apim ak
pen nibi ke mid tep ma gipim rek,
Juda bin bi mer okok,
God nop ag jupal,” agak.

²⁵Nibi Juda kai, God bin bi ne midojin, agil, ñi okok tik dapil, per per wañ wak tib gi rik gipim. Pen lo minim ne ak tib juil, ke niñnigabim rek ginigabim ak, bin bi yokop ñi wañ wak tib gi rik ma gipal rek ak midenigabim. ²⁶Nib aknib rek, bin bi siñok Juda mer ñi wak tib gi rik ma gipal okok, lo minim ageb rek genigal ak, God kirop bin bi ñi wak tib gi rik gipal ak rek niñnigab.

²⁷Juda bin bi mer, ñi wak tib gi rik ma gipal okok, lo minim ageb rek gipal. Pen nibi Juda kai, Mosis lo ñu kil tikak ak dil, ñi wak tib gi rik gipim ak pen lo minim tib jupim ak me, nibep minim kib midenigab.

²⁸Cin bin bi ognap apin, bin bi ñi wak tib gi rik gipal okok nep Juda bin bi yipid gil, apin ak pen ak minim niñid ma apin. Bin bi an an kiri Juda bin bi yipid gil midebal? Mib goñ nep niñil, Juda bin bi aka Juda bin bi mer, agil, ma agnigabin. ²⁹Juda bin bi yipid gil okok, nab kiri adañ niñil agnigabin, bi nibaul ne Juda nib yipid gil, agnigabin. Cin midmagil ne ak wak tib gi rik gi mideb niñil, bi ak bi Juda yipid gil, bin ak bin Juda yipid gil, agnigabin. Lo Mosis ñu kil tikak lo ak gek, midmagil kirop siñak wak ma tib gi riknigab; God Kaun ne nep midmagil kirop siñak wak tib gi riknigab. Bin bi midmagil kiri aknib rek mideb okok, bin bi okok kirop niñel yib ma mideb, pen God niñek yib mideb.

God ageb rek nep geb

3 ¹Nib agebin ak, bi alap agnigab, “Juda bin bi mer, wak tib gi rik ma gipal rek midobnop tep gipkop,” agnigab ak pen ar nibak ma agebin. ²Juda bin bi midobin ak tep yib midobin. Minim yad ke bin bi ognap kirop ag ñilañ, agil, God cinop Juda bin bi nep minim tep ne ñak. ³Pen Juda bin bi ognap nised sikop minim kilis aglak rek ma gilak. Nig gilak ak, God minim kilis kirop agak ak kirig ginigab aka? ⁴Mer yib, ma kirig

ginigab. Bin bi okok magilsek ñin ognap esek agnigal, pen God ne bi niñid yib agil, ageb rek nep ginigab. Minim nibak rek God Minim ak ñu kil tikil aglak,

“God, nak minim yipid gil nep apan ak,
nep minim ognap pen agnimel rek ma lip.
Nep minim kib agenigal ak,
minim wagin alap ma midenigab,” agak.

5“Cin per per gi timel genigabin ak, bin bi ognap niñil, God per per gi tep gip ak miseñ niñigal. Nib ak, God cinop kal gil minim kib agnig geb ak tep ma gip,” agnigabin aka? (Pen minim nibak, bin bi niñil apal rek nep agebin.) 6Mer yib! God bin bi magilsek minim kib agnigab ak, pis kid aka pis kid ma amnigab; yipid gil ar ak nep agnigab.

7Pen nibi ognap agnigabim, “Cin per per esek ar ognap genigabin ak, bin bi ognap niñil, God per per niñid nep ageb ak miseñ niñil, Bi melik sek yib mideb, agil, yib ne agel ar amnigab. Nib ak, tari ginig God cinop bin bi tap si tap timel gipim, agil, minim kib agil, yur kib ñinigab?” agnigabim. 8Minim esek nibak rek agil agnigabim, “Tap si tap timel ak nep gon gon, God cinop yimig yib niñil, tap si tap timel ke ke koñai yib ginigabin nibak niñil kirig ginigab ak, bin bi okok niñil, ne bi tep aknib ke agil yib ne agel ar amnigab,” agnigabim. Pen bin bi ognap yip ke ag juil, Pol minim nibak rek agip, apal. Pen yad minim nibak rek ma apin! Esek apal rek, God niñil, kirop minim kib agil, pen yur kib ñinigab.

Bin bi tep ma midobin

9Nib ak, tari agin? God niñek, cin Juda bin bi okok mid tep gipin; Juda bin bi mer okok mid tep ma gipal, agin aka? Mer! Midarik nep me apin rek, cin bin bi magilsek, Juda bin bi okok abe, Juda bin bi mer okok abe, tap si tap timel nag ar nibak cinop kilis gi lip gi dad amnig geb.

10Minim nibak rek, God Minim ak ñu kil tikil aglak,

“Bin bi per gi tep gipal rek ognap ma midebal.

11 Bin bi, nag ar nibak tep,
nag ar nibak timel, agil nipal okok ognap ma midebal.

Bin bi, ‘God pis ar amil,
nop eip midojin,’ ag nipal okok ognap ma midebal.

12 Bin bi okok magilsek God nop kirig gil,
bin bi timel rek midil,
tap si tap timel nep gipal.

Kiri magilsek aknib rek nep gipal.

13-14 Aleb kiri ak adik madik gil,
per esek yib nep apal.

Tigu migan kiri ak, cip kimek piraui ñi tep ma gel,
ki timel owip ak rek mideb.

Bin bi ognap kirop niñel milik yapek, ag juil,
 minim timel apal ak, toi timel kodal rek midebal.

15 Kal timel yib juil,
 bin bi okok kirop yur ñil,

ñag pak lin, agil,
 gos ak nep niñil,

16 bin bi okok kirop per gi timel gel,
 gos par yib nep nìpal.

17 Bin bi okok eip midil,
 kapkap mid tep ginimel rek ma lip.

18 God Bi Kib niñ mideb, agil,
 ma pirikpal,” aglak.

19 God lo minim nibak cinop Juda bin bi nep ñak ak me, minim nibak magilsek cinop Juda bin bi ageb. Nib ak, God minim kib agnigab ñin ak, bin bi karip lim tigoñ tigoñ magilsek minim pen alap agnimel rek ma linigab; kiri magilsek minim midenigab. 20 Nib ak, bi alap lo minim ageb rek genigab ak, God bi nibak nop, bi komiñ tep yad, ma agnigab. Pen God lo minim ageb rek niñil, cin tap si tap timel gipin, agil niñnigabin.

**Bin bi Kraiss nop niñ dipal okok nep, kirop bin
 bi asiñ ma mideb tep yad, agnigab**

21-22 Pen miñi Mosis abe, bi God minim agep bi okok abe, nig ginigab, agil, ñu kil tikil aglak rek, Jisas Kraiss cinop nen agil kimak ak me, nop niñ don, God cinop agnigab, “Nibi bin bi komiñ tep yad,” agnigab. Pen cin Juda bin bi okok abe, Juda bin bi mer okok abe, lo ar ak nep niñil gon, nig ma agnigab.

23 Cin bin bi magilsek tap si tap timel gipin rek, God melik magil tep ne ñib dijin rek ma lip ak pen 24 God cinop yimig niñil, Kraiss Jisas ag yokek apil cinop tau adik dip ak me, God cinop bin bi tep yad agnigab.

25 Yad titi gen, bin bi tap si tap timel gipal okok kirop bin bi tep yad, agnigain ak niñnimel, agil, God ne Kraiss Jisas nop tap sobok gep rek lim dai wagin aul ag yokak. God ne bin bi tap si tap timel ned gilak okok, minim kib agil, kal juil, yur pen ñil, pis nep ñag pak lipkop ak pen ne kapkap sain tik midil, nig ma gak. Pen miñi Kraiss Jisas ne apil, bin bi tap si tap timel gipal okok magilsek miñ goñ ne ke dil yur kib dil kimak. Nib ak me, bin bi an an, Jisas lakañ ne tap si tap timel cinop lig gi yokip, agil, Jisas nop niñ denigal bin bi okok, God kirop niñil kal juil yur pen alap ma ñinigab. 26 Yad titi gen, bin bi tap si tap timel gipal okok kirop bin bi tep yad, agnigain ak niñnimel, agil, God ne nig gak. Minim kib agil, tap si tap timel gipal rek pen yur ak rek nep ñinigain, agak ak me, ne agak rek nep gil, Kraiss Jisas nop tap sobok gep rek ag yokek, bin bi nop niñ denigal okok kirop bin bi tep yad agnigab.

²⁷Nib ak, lo ar ak gon, God cinop bin bi tep yad agil dek, bin bi ne midobin, agil, yib cin ke agon ar amniniņ rek ma lip. Jisas cinop nen agil kimak minim tep ak niņ dil me, God bin bi ne midobin. ²⁸Nib ak, bin bi okok lo minim ageb rek gipal, agil, God kirop bin bi tep yad ma agnigab. Bin bi Kraiss Jisas gak minim tep ak niņ dipal, agil me, God kirop bin bi tep yad agnigab.

²⁹God ne cin Juda bin bi, God cin nep mer; ne Juda bin bi mer okok God kiri abe mideb. ³⁰Tari ġinig: God ne nokim ak me, bin bi ñi wak tib ġi rik gipal okok abe, bin bi wak tib ġi rik ma gipal okok abe, kiri kanib nokim ak nep amel, God kirop bin bi tep yad agnigab. Nib ak, kiri magilsek Kraiss Jisas gak minim tep nibak nep niņ dinimel.

³¹Pen cin Jisas minim tep ak niņ don, God cinop bin bi tep yad agnigab, agebin ak, lo minim okok kirig ġinigabin, agil ma agebin, mer. Bin bi Jisas minim tep ak niņ dinigal okok, kiri minim tep nibak ageb rek nep gel, lo minim ak am kilis ġinigab.

God Ebrahim nop bi tep yad agak

4 ¹Cin Juda bin bi, based acik cin wagin gil tikek, tik amil apil gil tikel midobin okok, based cin ak me Ebrahim. Pen God Ebrahim nop dak ak, titi gil Ebrahim dak? ²Ebrahim ne ke tap tep alap gek, God nak bi tep yad, apkop, Ebrahim bi okok agil “Yad bi tep,” apkop. Pen God niņip Ebrahim yib ne ke dap raneb wagin alap ma midek. ³Pen ti ġinig Ebrahim yib ne ke ma dap ranbkop? God Minim ageb, “Ebrahim ne God minim agak ak niņ dak ak me, God nop ‘Nak bi tep yad,’ agak.”

⁴Bi alap wög ġil pe dil, mani nibaul yokop dipin ma agnigab; wög genek pen ak mani aul dipin agnigab.

⁵Pen bin bi, cin God nop kilis cin ke wög ġenigabin, ne cinop bin bi tep yad agnigab, ag gos niņnigal okok, God kirop bin bi tep yad ma agnigab. Pen bin bi, tap si tap timel ġipin ak pen God tap si tap timel ġipin nibak yokop kirig ġil, cinop bin bi tep yad agnigab nipal okok, kirop bin bi tep yad agnigab.

⁶Minim agebin aul rek, Depid ak rek nep birarik nep God Minim ak ñu kil tikel, bin bi tap tep alap ma ġinigal pen God kirop bin bi tep yad agnigab okok miñ miñ ġinigal, agak. Ne agak,

⁷“Bin bi tap si tap timel gipal okok,

God tap si tap timel kiri gipal okok niņil kirig ġinigab rek,
tep gek niņlig ġi midenigal.

Bin bi tap si tap timel gipal okok,

God tap si tap timel kiri gipal okok minim kib ma agnigab rek,
miñ miñ ġilig ġi midenigal.

⁸Bin bi tap si tap timel gipal okok,

Bi Kib tap si tap timel kirop lig ġi yoknigab rek,

miñ miñ gilig gi midenigal,” agak.

⁹Depid miñ miñ gep magil agak ak, bin bi ñi wak tib gi rik gipal okok nep minim ak dinigal? Mer yib! Bin bi ñi wak tib gi rik ma gipal okok abe dinigal. God Minim ñu kil tikil aglak dai nibak miñi nep agesin: “Ebrahim ne God minim agak ak niñ dak ak me, God nop, ‘Nak bi tep yad,’ agak.”

¹⁰Based acik cin Ebrahim, wak tib gi rik ma gak ñin ak, God minim agak ak niñ dek, God nop, “Nak bi tep yad,” agak. ¹¹“Ebrahim minim yad niñ dak ak me, yad, ‘Nak bi tep yad,’ apin ak, bin bi okok niñlañ,” agil, kisen God agek, Ebrahim wak tib gi rikak. God nig gak ak nipin. Nib ak, bin bi ñi wak tib gi rik ma gil, God Minim niñ del, kirop, “Bin bi tep yad,” agnigab bin bi okok, Ebrahim nised acik kiri mideb.

¹²Pen bin bi ñi wak tib gi rik gil, Ebrahim wak tib gi rik ma gak ñin ak God minim ne niñ dak rek nep niñ dipal bin bi okok, Ebrahim nised acik kiri ak rek nep mideb.

¹³Pen Ebrahim lo ar okok niñil gek, God nop, “Nak bi tep yad,” agil ma dak. Ebrahim ne God minim agak ak niñ dak ak me, God nop, “Nak bi tep yad,” agil, minim kilis niñid agil, Ebrahim abe ñi pai ne nib okok abe kirop agak, “Ñibi karip lim wagin aul tigoñ tigoñ magilsek dinigabim,” agak.

¹⁴⁻¹⁵God minim kilis niñid agak ak, bin bi lo ar ak niñil gipal okok apkop, God minim kilis niñid agak nibak tap yokop rek lipkop. Tari ginig: bin bi lo ar ak kisen gil, God bin bi ne midonigabin agil nipal bin bi okok, kiri magilsek lo minim ognap tib junigal niñil God kal juil, minim kib agil, pen yur ñinigab. God minim kilis niñid agak ak, bin bi lo ar ak niñil gipal okok apkop, God minim agak niñ dipal ak tap yokop rek lipkop. Ti ginig: bin bi God minim agak niñ dipal okok niñ tep ma gil, sidol ginigal. God minim kilis niñid Ebrahim nop agak ak ma dinigal.

¹⁶Nib ak, cin nipin, God ginigain, agil, minim kilis niñid ag lak nibak, bin bi God minim agak niñ dinigal okok kirop nep agak. Nib ak, God gos ne ke bin bi yimig niñil, yokop di tep ginigab ak me, Ebrahim ñi pai ne okok magilsek God minim kilis niñid agak ak rek dinimel. Bin bi God ne kirop lo minim ñak okok abe, bin bi Ebrahim rek wak tib gi rik ma gil God minim niñ dak rek niñ dipal okok abe, kiri magilsek God minim kilis niñid agak ak nep dinimel. Ebrahim ne based acik cin magilsek mideb me ak. ¹⁷God Minim ak ñu kil tikil aglak, “God Ebrahim nop agak, ‘Yad gen, bin bi wagin ke ke konjai nep midebal okok, nep based acik cin, agnigal,’ agak,” aglak. Nib ak, God udin yirik ar ne ak, cin bin bi wagin ke ke okok nib nop niñ dipin okok magilsek based acik Ebrahim ñi pai ne yib midobin. God ne bin bi kimbak okok gek, kiri warikpal. God ne nep gek, tap ned ma midoligip ak miñi miserj lip.

Ebrahim God nop niñ dak rek nep gin

¹⁸Pen Ebrahim milep yib lil, ñi pai tiknimin rek ma lek, God nop agak, “Nak wagin gek, bin bi ñi pai nak kisen midenigal okok, wagin ke

ke koŋai yib mideniġabim,” agak. Nib agek Ebrahim, God minim niġid ageb, aġil, gos sek midil me, agak rek nep me, bin bi ñi pai ne wagin ke ke koŋai yib nep midebal.

¹⁹Pen Ebrahim niġak, miġ goŋ kiri ber mal mosik bir gi mosik yowak. Ebrahim mi ne maŋ ñin juil akniġ mamid alaŋ (100) amnak ak me, ñi pai tikep rek ma lak. Bin ne Sera ak rek nep milep yib lek, ñi pai tikep rek ma lak. Pen ne God minim nop agak ak niġ di kilis gi damil, gos sek midek. ²⁰⁻²¹God ne Ebrahim nop minim kilis niġid agak ak, Ebrahim gos omal ma niġak; ne pis nep niġ dak. God Bi kilis sek, minim kilis niġid agak rek nep ġiniġab, aġil, God minim agak ak niġ dilig gi midek rek, gos won ne ak kilis ognap sek dil, ne God minim agak ak di kilis yib gil, God yib nop ak agek ar amnak. ²²Ebrahim gak nibak, God Minim ak ñu kil tikil aġlak, “Ebrahim ne God minim agak ak niġ dak ak me, God nop, ‘Nak bi tep yad,’ agak,” aġlak. ²³“God nop, ‘Nak bi tep yad,’ agak,” minim ñu kil tiklak nibak, Ebrahim nop nep ñu kil ma tiklak. ²⁴Cinop abe, niġnimel aġil, ñu kil tiklak. God ne gek, Bi Kib cin Jisas warikak nibak niġ dipin ak me, ne cinop abe bin bi tep yad agniġab. ²⁵Pen tap si tap timel gi asin midonok rek, God cinop yimiġ niġil, Ñi ne Jisas Krais nop ag yokek apil, “Kiri tap si tap timel ġipal nibak God niġil kirig ġinimiġ,” aġil, kimak. Pen Jisas kimil, God gek, kauyaŋ warikak rek, asin kib gac cinop ulik gak nibak komiŋ linimiŋ rek lip.

God nop niġ deniġabin ak, cinop bin bi asik masik ma mideb agniġab

5 ¹⁻²Pen God cinop yimiġ niġil gak nibak niġ dipin ak me, cinop bin bi asik masik ma mideb aġil, dip. Nib ak, Bi Kib cin Jisas Krais ne gek, cin God eip ġim ñil midil, kapkap mid tep ġipin. Pen karip lim cinop ag lip ak amil, God melik tep ne ak niġil, nop eip mideniġabin, aġil, tep gek niġlig gi midobin.

³Miker apek, koslam midobin ak, miñ miñ ġilig gi midobin. Tari ġiniġ: miker apek, koslam mideniġabin ak, cin kilis gi, Jisas Krais cig tep gi, ma kirig ġiniġabin. ⁴Cin kilis gi, Jisas Krais cig tep gi, gi dam dam, cin bin bi gos maġil kilis sek mideniġabin. Pen gos maġil kilis sek mideniġabin ak, cin gos sek mideniġabin. ⁵Pen niġ gi gos sek mideniġabin ak, yokop ma mideniġabin. Tari ġiniġ: God ne Kaun Siŋ ak cinop ñil cinop midmaġil yib lipir.

⁶Pen cin bin bi lim dai ar wagin aul midobin okok, tap si tap timel gi damil gac sek midonok, God eip ġim ñil midoġin rek ma lak. Cin kanib ameb alap ma midek. Pen God ne ag lak ñin ak nep, Krais cinop bin bi timel nen aġil kimak. ⁷Per bin bi ognap, bi tep alap nop niġil, “Yad nop nen aġil kimen, ne komiŋ amnaŋ,” aġil ma kimniġal. Pen ñin nokim nokim ognap bi alap bi tep yib alap rek niġil, “Yad nop nen aġil kimen, ne komiŋ amnaŋ,” aġil kimniġab aka ma nipin. ⁸Pen cin tap si tap timel

gi midonok ñin nibak nep, Krajs cinop nen agil kimak. Nib ak, cin nipin, God cinop midmagil yib lip.

⁹Krajs ne cinop nen agil kimek, lakañ ne yapek, God cinop bin bi tep yad agak. Nib ak me, cin nipin, God kal juil minim kib agnigab ñin ak, Krajs ne cinop di komiñ yoknigab. ¹⁰God kaual maual ne midonok ñin ak me, Ñi ne kimil, cinop Nap eip di jim ñak. Miñi Nap eip jim ñil midobin ak me, Ñi ne warikil komiñ mideb ak, cinop niñid nep di komiñ yoknigab! ¹¹Pen nibak nep mer. Cin God eip jim ñil midobin rek, Bi Kib cin Jisas Krajs ne nep gek, God eip jim ñil midobin, agil, yib kirop apil mal dap ranlig gi, tep gek niñlig gi midobin.

**Adam yakam ne kimbak pen Jisas yakam
ne komiñ per midep magil dipal**

¹²Pen tap si tap timel gil kimeb wagin ak, Adam nep wagin gil gek me, asiñ ne nibak bin bi tik lep ne okok magilsek kimbak. Tari ginig: God niñek, Adam gak nibak, cin bin bi tik lep ne okok magilsek nig ginok. Ñin nibak cinop ma tik dolak ak pen cin eip ginok.

¹³God Mosis nop lo minim ñak ar ak, tap si tap timel gep gos ak lim dai ar wagin aul ned midek. Pen lo ma midek ñin ak, God tap si tap timel gilak ak niñil, kisen pen ñinigal, agil, gos ma niñ midek. ¹⁴Pen Adam wagin gil gi timel gek, asiñ ne nibak bin bi okok kirop ulik gek, magilsek kim dap dap, Mosis lo minim ag ñak ñin ak owak. Adam God minim nop agak ak tib juak rek, bin bi ognap ma tib julak ak pen Adam kimak rek magilsek kimlak. Adam ne Bi kisen oniñ gek Bi ak rek.

¹⁵Adam gi timel gak ak ke; Jisas Krajs tap tep ñak ak ke. Adam tap si tap timel gek, bin bi magilsek kimbak. Pen Jisas Krajs bin bi yimig niñil kimak rek, God bin bi okok magilsek yimig yib niñil, di tep gil, tap tep yib ñib.

¹⁶Bi nokim nibak tap si tap timel gak ak ke; God tap tep ñib ak ke. Adam tap si tap timel nokim nibak gak ak, God niñil minim kib agil, nak kimnigan agak. Pen Adam ñi pai ne tap si tap timel gi dam dam, Jisas Krajs tap tep yokop ñek, God, “Bin bi okok magilsek per per komiñ midenimel rek lip,” agak.

¹⁷Ned bi nokim alap tap si tap timel gek, asiñ kilis timel yib nibak cinop magilsek ulik gak. Pen kisen, nig ar nib akniñ rek mer, God bin bi yimig yib niñil di tep yib gek, bin bi asiñ ma mideb agnigab okok, bi nokim Jisas Krajs gek, kiri komiñ midil ne eip tep gek niñlig gi midenigal.

¹⁸Adam tap si tap timel magil nokim alap nep gek, asiñ nibak bin bi magilsek ulik gek, God minim kib agil, “Bin bi magilsek kimnigal,” agak. Pen Jisas Krajs ñin nokim alap nep tap tep yib gek, God bin bi magilsek kirop bin bi tep yad, agil, komiñ midep magil ak ñinimiñ rek lip. ¹⁹Bi

nokim alap God minim agak ak tib juak rek, God niņek, cin bin bi magilsek tap si tap timel ginok. N̄in nibak cinop ma tik dolak ak pen cin eip ginok. Nib aknib rek nep, bi nokim alap God minim agak rek niņil kimek, God bin bi magilsek kirop bin bi yad agniņiņ rek lip.

²⁰Bin bi ned tap si tap timel gi mideliņipal; God ne lo minim kisen ñak. God lo minim ñak ak, bin bi, lo minim tib juil tap si tap timel gipal ak niņnimel, agil, lo minim ñak. Nib ak, tap si tap timel gilak okok koņai yib nep gel amnak. Pen God bin bi tap si tap timel gilak okok kirop yimig yib niņil, di tep yib gak.

²¹Nib ak, tap si tap timel asiņ nibak kilis yib gil, bin bi magilsek ulik gek, cip kimbak rek midelak. Pen God niņ gil bin bi okok kirop yimig yib niņil, di tep yib gil, bin bi tep yad, agil, komiņ per midep nibak niņigab. Bi Kib cin Jisas Krais ne gi tep gak ak me, God niņ ginigab.

Jisas eip pis nep kimnok agil, tap si tap timel gep gos ar ak ma niņjin

6 ¹God cinop yimig niņip nibak, bin bi ognap agniņal, “Tap si tap timel abramek gilig gi midon midon, God cinop ned niņil di tep gip rek mer, kisen cinop yimig yib niņil di tep yib ginigab,” agniņal. ²Pen minim esek niņ rek ma agin! Cin tap si tap timel gep nag ar ak, cin bir kimnok. Nib ak, midmagil cin pilis gek, tap si tap timel giņin rek ma lip. ³Nibi niņim, cin bin bi Krais Jisas eip jim ñil midoņin agil niņ paknok okok, “Ne kimak rek jim ñil kimbin,” agil, niņ paknok. ⁴Cin niņ paknok ak, Krais Jisas eip cip tigel miņan yapil kimnok rek lip. Tari ginig: Krais ne kimek, kab miņan ak tigel gilak pen Nap kilis ke yib ne ak gek, warikil komiņ mideb rek, cin aknib rek cip tigel miņan rek midobin ak warikil, komiņ kisen nib ar ak midoņin rek lip.

⁵Krais eip jim ñil kimnok ak me, ne kauyaņ warikil komiņ mideb rek, kisen cin ak rek nep warikil komiņ mideniņabin. ⁶God ne gos niņak, tap si tap timel gep nag ak pis nep tib gi rik gek, kisen bin bi okok kirop miņ wög gep bi rek, kanib timel ak di lip gi ma dad amniņiņ, ag gos niņak. Nib ak me, nag ar timel goliņipin ak, Krais eip mab bak alaņ ñag pak lel kimak. ⁷Pen tari, bin bi pis nep kimbak okok, tap si tap timel gep magil ak midmagil kiri pilis gek ginimel rek ma lip.

⁸Cin niņin, Krais eip kimnok ak me, ne eip komiņ mideniņabin. ⁹Cin niņin, Nap ne gek Krais warikak rek, ne kauyaņ ma kimniņab. Miņi kimeb won ak Krais nop tap alap ginimniņ rek ma lip. ¹⁰Krais ne niņ nokim alap nep kimak ak pen tap si tap timel gep kilis ak pis nep kir gip. Krais kauyaņ warikil, am God eip midebir.

¹¹Nib ak me, Krais Jisas eip ulik gil, tap si tap timel gep ar ak pis nep kimil, warikil God eip komiņ midobin, agil gos niņniņib. ¹²Tap si tap timel gep won ak, nibep ñon gi lip gi dam, bi miņ wög gep rek midil, tap si tap timel gim, agniņab. Pen nibi mer agniņib. ¹³Pen gos timel nibi ak, miņ gon

ñin tob nibep dai alap, tap si tap timel ginimiñ, agil, lip gi gonimiñ rek, nibi miñ goñ nibi dai dai okok magilsek pis nep mer agnimib. Jisas eip kimil warikpin ak me, gos midmagil timid cin God nop ñil, miñ goñ dai okok God nop ñil, ne ageb rek nep gin, agil niñnimib.

¹⁴Ned lo minim ar ak niñil gin, ag gos ak nipek ak pen tap si tap timel gep gos ak nep lek, nig göligipim. Pen miñi ar nibak rek ma midebim. God nibep yimig niñil dek, Kraiss bin bi ne midebim ak, nop cig gil, tap si tap timel gipim okok kirig ginigabim.

Nag asiñ ma mideb tep ar ak nep amjin

¹⁵Pen God lo minim ar ak gon, God niñil cinop ma ñinigab; ne ke cinop yimig niñil, Kraiss nop ag yokek apil, cinop nen agil kimak rek, ñinigab. Nib ak, tap si tap timel nep gi midojin aka? Mer yib! Nig ma gin. ¹⁶Nibi nipim, nibi bi kib alap nop, cin bi miñ wög gep nak midil, wög tari agnigan ginigabin, agenigabim ak, nibi bi kib nibak mok ne okok midebim. Nibi tap si tap timel gep nop miñ wög gep bi rek midenigabim ak, tap si tap timel gep mok okok midil kimnigabim. Pen nibi God minim ageb miñ wög gep bi rek midenigabim ak, God minim ageb mok okok midem, ne nibep bin bi tep yad agnigab.

¹⁷Ned nibep tap si tap timel gep gos ak nep lek, bin bi miñ wög gep rek midil, ar nibak nep göligipim. Pen kisen, Jisas minim tep ak niñil, pis nep niñ dipim. Nig gipim ak, yad God nop tep agebin. ¹⁸God ne gek, nibi tap si tap timel mok okok midil, añ dil, God miñ wög gep bin bi rek midil, ne ageb rek gi tep gipim. ¹⁹Pen nibi ke kilis ma midebim rek, minim agniñ gebin aul, yad misen nep agen niñ tep ginimel, agil, misen nep agnigain.

Ned nibi gos timel yib niñil, miñ wög gep bin bi rek midil, miñ goñ ñin tob nibi okok tap si tap timel yib gi damil, gi timel yib nep göligipim. Pen miñi gos tep yib niñil, miñ wög gep bin bi rek midil, miñ goñ ñin tob nibi okok God minim ageb rek nep gi damil, komiñ tep nep midenigabim. ²⁰Ned tap si tap timel gep miñ wög gep bin bi rek mideligiipim ak, God minim ageb ar ak nibep kod midek, mok ne okok ma mideligiipim. ²¹Pen ned gi timel göligipim nibak, miñi niñil agnigabim, “Per nig gi timel goliigipin ak, nabiñ gip. Nig gil tap tep alap ma dipin,” agnigabim. Bin bi nig gipal okok kimnig gebal.

²²Pen miñi God ne gek, nibi tap si tap timel mok okok midil, añ dil, God miñ wög gep bin bi rek midil, God niñek tep ginigab ar ak nep gil, komiñ per midep magil ak ñinigabim. ²³Tap si tap timel gep ar ak gi damil, saj dil kimnigabin; pen Bi Kib cin Jisas Kraiss eip jim ñil midenigabin ak, God cinop komiñ per midep magil ak yokop ñinigab.

Kraiss miñ goñ ne midebim rek, ne eip kimbek

7 ¹Nibi ai mam lo minim nipim okok. Nibi nipim, bin bi komiñ midebal okok nep lo minim kisen ginigal; kimenigal, miker kiropon ognap ma midenigab.

²Minim alap bak okok rek alap mideb. Lo minim alap agip, bi ne midenigab, bin ne nigmil eip midenimiņ; pen nigmil kimnigab ak, lo nibak kir ginigab. ³Bin ak nigmil midek niņlig gi, am bi kisen nib alap niņil denigab ak, nop agnigal, “Lo minim tib juil, nak bi si dep bin,” agnigal. Pen nigmil kimek, am bi kisen nib niņil denigab ak, minim ma mideb. “Lo minim tib juil, nak bi si dep bin,” agil, ma agnigal.

⁴Pen ai mam sikop. Nib akniņ rek nep, nibi Kraiis miņ goņ ne midebim okok, ne eip kimbek rek, lo minim di cici lölöigipim ak kirig gipek niņil Bi alap nibep dinigab. Bi siņak kimil warikak Bi ak nibep dek, nibi God nop tep ginimiņ ar ak nep ginigabim.

⁵Ned pen Kraiis cinop ma dak ñin ak, tap si tap timel gep won ak cinop di cici lolöigip. Lo minim ar ak nep kisen gin, ag midölöigipin ak pen gos timel nab cin adañ pag yikek, mab silek ñib kimeb magil ak miseņ lek, mid tep ma golöigipin. God eip midoĵin rek ma lak. ⁶Pen miņi Kraiis eip kimbin rek, lo minim cinop nag rek lil di cici lolöigip ak pak ulek lil me, Juda lo minim ñu kil tiklak ar ak niņil ma gipin; God Kaun gos ñeb ar ak nep niņil gipin.

Lo mideb rek, tap si tap timel gipin ak miseņ niņin

⁷Ñib ak, cin tari agin? God lo minim agek aglak ak, minim timel ageb, agĵin aka? Mer yib! Akniņ rek ma agin.

Lo ma midobkop, yad tap si tap timel titi rek mideb ak ma niņnep. Lo minim ar alap ñu kil tikil aglak, “Bin bi ognap tap kiri okok tap yad rek midebkop, agil, gos ak ma niņniņiņib,” aglak. Nib ak me, yad niņin, bin bi ognap tap kiri okok tap yad rek midebkop, ag gos niņenigain ak, tap si tap timel ginigain. ⁸Ñib ak, yad gos niņin, kisen yad tap si tap timel gil, bin bi ognap tap kiri okok tap yad rek midebkop, ag gos ak ma niņniņigain. Yad niņgil gos niņölöigipin ak pen dai tap si tap timel gep won ak am gos timid yad lip gi dad amek, bin bi ognap tap kiri okok koņai yib nep tap yad rek midebkop, ag gos ak nep niņnek. Pen lo minim ma midobkop, tap si tap timel gep magil kilis ma midobkop, bi bir kimib rek midobkop.

⁹Lo minim, ak ginimiņ, ak ma ginimiņ, ageb ak, yad ned ma niņölöigipin. Yad nig gil komiņ midenek. Pen lo minim ak apek, tap si tap timel gep magil ak, bi komiņ mideb rek lil, kilis dil yip lip gi dad amek, kimnek. ¹⁰God lo minim ñak ak, cinop kaniņ per midep ak yobkop pen yip kimeb magil nep ñak. ¹¹Ñib ak, yad gos niņin, kisen yad tap si tap timel gil, bin bi ognap tap kiri okok tap yad rek midebkop, ag gos ak ma niņniņigain. Yad niņgil gos niņölöigipin ak pen, dai tap si tap timel gep magil ak am gos timid yad lip gi dad amek, bin bi ognap tap kiri okok tap yad rek midebkop, ag gos niņnek. Tap si tap timel gep magil ak, God lo minim agak ak nep dil, yip ñag pak lak.

¹²Ñib ak, cin niņin, God lo minim ak siņ mideb. Cin niņin, “Bin bi ognap tap kiri okok tap yad rek midobkop, ag gos ak ma niņniņiņib,” lo

minim nibak, God ne ke minim kilis agak ak, siŋ nep, yipid gil nep, tep nep mideb. ¹³God lo tep nibak yip ñag pak lek kimnek aka tari? Ak mer! God lo minim tep ak agek nipin rek, miker kib nibak ma dinigabin. Tap si tap timel gipin rek, miker kib nibak dinigabin. Pen ne cinop lo minim agak nibak, gos alap ke niŋil ma agak; tap si tap timel gep magil ak gac kib yib mideb ak niŋnimel, agil, lo minim agak. Nib ak, God lo minim ak agek nipin rek, ma kimnek; tap si tap timel gep magil ak, lo minim tep nibak dil, yip ñag pak lek kimnek.

Tap ma gin ag gos nipin tap okok nep gipin

¹⁴Cin nipin, lo minim ak, God gos ñek ñu kil tiklak. Nibak pen yad bi nep midebin; yad miñ wög gep bi rek midil, cibur gos timid yad ak per ameb tap si tap timel gep miñ ar ak. ¹⁵Nib ak me, tap tep ginim, ag gos nipin ar ak ma gipin; yad tap si tap timel gep miñ ar ak, yad magil nibak milik kal nipin ak, yad nig ma ginim, ag gos nipin ar ak nep gipin. Pen tari ginig nig gipin ak ma nipin. ¹⁶Yad gi timel ma ginim, ag gos nipin ar ak nep gipin rek, yad nipin, gos magil yad abe God lo minim ak abe adip adip rek mideb.

¹⁷Miñi yad ke tap timel ma gipin ak me. Yad ke timel ginim, agil, ma gipin; tap si tap timel gep magil ak gos cibur midmagil yad nab adaŋ mideb ak nep gip. ¹⁸Yad nipin, yad bi nep midebin rek, midmagil acir nab yad adaŋ mid tep ma gip. Gos cibur midmagil yad gos tep ñek, tap tep alap ma ginigain. Gos magil yad ak, gi tep ginim agil nipin ak pen yad ginim rek ma lip. ¹⁹Nig gek me, gi tep ginim, ag gos nipin ar ak ma gipin; gi timel ma ginim, ag gos nipin ar ak nep per gen ameb. ²⁰Nib ak, yad gi timel ma ginim, ag gos nipin ar ak nep gipin rek, yad ke tap timel ma gipin. Tap si tap timel gep magil ak gos cibur midmagil yad nab adaŋ mideb ak nep gek gek geb niŋil gipin.

²¹Nib ak, yad nipin, yad gi tep ginim ag gos nipin ak pen per gi timel ginim rek lip. ²²⁻²³Gos yad ak God lo ñak ak miñ miñ yib gipin ak pen gos cibur midmagil yad nab adaŋ aknib ke gil, gos magil yad ak eip pen pen gek, tap si tap timel gep magil ak miñ goŋ yad nab okok midil, yip di cici lek, yad bi nagiman rek midebin.

²⁴Yad miñ miñ ma gipin; bi yim gep rek midebin. Gos cibur midmagil yad ak yip ñag pak linig geb; bi an yip di komiŋ yoknigab? ²⁵Bi Kib cin Jisas Kraiss nep! God nop tep agebin!

Pen minim agebin aul, nig gil mideb: gos yad ak God nop miñ wög gep bi rek midebin ak pen midmagil acir nab yad adaŋ siŋak, tap si tap timel gep magil ak miñ wög gep bi rek midebin.

God Kaun cin eip midenigab ak, cin tipeg bin bi rek midenigabin

8

¹⁻²Pen cin Kraiss Jisas eip jim ñil midobin ak, Kraiss Jisas ne kimek, God Kaun komiŋ magil ñib ak ne cinop di komiŋ yokek, cin miñi

tap si tap timel gep magil ak abe, kimeb magil ak abe, kirop miñ wög gep bin bi rek ma midobin. Nib ak, God cinop minim kib ma agniğab. ³Pen bin bi tep ma midobin rek, God lo ar ak gi damil, mid tep giñin rek ma lek, God Ni ne ke ak ag yokek, bi yib miş goñ cibur midmagil cin aknib rek lil, owak. Ne kimil tap si tap timel gep magil ak pis nep gi ke yokañ, agil, God ne Ni ne ke tap sobok gep rek yokil, tap si tap timel gep magil ak bin bi midmagil acir nab kiri adañ mideb ak, minim kib agil, dai juip agak. ⁴God nig gak ak, cin gos timel midmagil acir nab cin eyañ nib owip ar ak kirig gil, God Kaun gos ñeb ar ak gi damil, lo minim yad ageb rek gi tep ginimel, ag gos niñil gak.

⁵Bin bi gos timel midmagil acir nab kiri eyañ nib apek, ar nibak nep gel ameb okok, cibur midmagil kiri tari gos gip ar ak nep gos nipal. Pen bin bi God Kaun kirop gos ñek gel ameb okok, God Kaun tari gos gip ar ak nep gos nipal. ⁶Bin bi cibur midmagil kiri tari gos gip ar ak nep gos nipal okok, ar nibak nep tap si tap timel gil kimniğal. Pen bin bi God Kaun nop tep ginigab ar ak nep gos nipal okok, ar nibak nep gi tep gil, God eip jim ñil komiñ midil, mid tep ginigal.

⁷Bin bi cibur midmagil kiri tari gos gip ar ak nep gos nipal okok, gos magil kiri God nop kausal maual rek mideb. Gos magil kiri God lo ne ma niñip; God lo ne niñnimiñ rek ma lip. ⁸Bin bi gos timel midmagil acir nab kiri eyañ nib apek, ar nibak gel ameb bin bi okok, God nop tep ginimiñ ar ak ginimel rek ma lip.

⁹Pen nibi bin bi God Kaun nibep nab adañ mideb okok, gos timel midmagil acir nab nibi eyañ nib apek, ar nibak ma gipim; God Kaun nibep gos ñeb ar ak nep gipim. Bin bi Krai Kaun ne kirop nab adañ ma mideb okok, Krai bin bi ne ma midebal. ¹⁰Krai ne nab nibep adañ mideniğab ak, tap si tap timel gep magil ak gek, miş goñ nibi kimniğab; pen Jisas kimek God nibep niñek, bin bi tep rek midebim ak rek, Kaun ne gek, kaun nibi komiñ mideniğab. ¹¹God ne gek Jisas warikak ak, Kaun ne nibep nab adañ mideb ak me, God nokim nibak nep nibep ak rek nep gek, Kaun ne nibep nab adañ mideb ak ne miş goñ nibep komiñ midep magil ñiniğab.

¹²Nib ak, ai mam sikop, cin dai alap mideb. Gos timel midmagil acir nab cin adañ pilis gi ñek ar nibak gil, dai nibak ma ñiniğabin. ¹³Ar nibak gem amek, kimniğ gebim. Pen God Kaun ak nibep gi ñek niñlig gi, nibi tap si tap timel gipim nibak pis nep kirig geniğabim ak, God eip komiñ mideniğabim.

¹⁴God Kaun gos ñek niñlig gi ajpal bin bi okok, God ni pai ne midebal. ¹⁵⁻¹⁶Kaun nibi dipim ak, nibep lip gi dad amek, nibi ned piriköligipim rek kauyañ pirikil, miñ wög gep bin bi rek ma mideniğabim. Kaun nibi dipim ak, ne gek, God ni pai ne midebim. Nib ak niñil cin nop “Aba! Bapi!” apin.

¹⁷Ñi pai ne midobin ak me, tap tep tari tari ñi pai ne ñinigab ak, cin dinigabin. Pen Kraiss nop ag juil gi timel gilak rek, cinop ak rek nep gi timel gel, ma piriknigabin ak, God Kraiss nop di tep gak rek, cinop ak rek nep di tep ginigab.

Kisen mid tep ginigabin

¹⁸Gos yad nipin, cin Kraiss nop cig midil, miker ognap gek, koslam midenigabin ak, ak tap sikol. Kisen God ne tap tep yib cinop ñek, ne eip mid tep ginigabin ak, ak tap kib.

¹⁹God tap tari tari gi lak okok magilsek miñi mid tep ginimiñ rek ma lip. Tap okok magilsek kod midek, God ne ñi pai ne misen dinigab ñin ak nep, ne gek, tap nib okok kauyan mid tep ginigab. ²⁰⁻²¹Gip nibak, God birarik nep niñebir ginigab agak rek nep gip. Pen God birarik ped okok niñak, ñi pai yad misen dinigain ñin ak, yad gen, ñi pai yad miñ miñ gil mid tep yib ginigal rek, tap magilsek gi linek okok ak rek nep, ma piyam gi yapil, miñ miñ gil mid tep yib ginigab.

Pen tap gi lak nib okok, ned mid tep ma ginigab. Pen cinop gek, ñi pai ne ke yib midil ne eip mid tep ginigabin ñin ak nep me, kauyan gek tap nib okok mid tep ginigab.

²²Cin nipin, tap God gi lak nib okok magilsek mid tep ginigab ak pen birarik nep miker gek, bin ñi pai tiknig gel yur gip rek ak goligip. ²³Pen cin abe miker nibak mideb. Kisen kirop pis nep dinigain, agil, God ne Kaun ak ned nep ag yokek apil cinop nab adañ mideb ak, pen ñin akal rek cinop ñi pai ne ke yipid gil yib misen dek, cin miñ goñ kisen nib ulek lin, agil, midmagil cin nab adañ miker nibak gek niñlig gi, lim dai ar wagin aul kod midobin.

²⁴God tap kisen misen linigab agak minim ak niñ don, cinop dak. Pen tap tari tari kisen misen linigab ak magilsek bir nipnop, miñi gos sek midil ñin kisen ak ma kod midobnop. Tap bir nipal ak ma kod midenigal. ²⁵Pen, tap kisen misen linigab, ag gos ak niñil me, yirik gek niñlig gi ma kod midobin; gos sek kod midobin.

²⁶Bin bi kilis ma midobin rek, Kaun cinop gi ñilig gi mideb. Cin God nop sobok gin agebin ak pen titi gil God nop sobok ginigabin ak ma nipin. Pen Kaun cinop tau sak lil, God nop sobok gilig gi mideb. Minim bin bi niñeb rek mer; kaddad minim lil sobok gilig gi mideb. ²⁷God pen gos cin magilsek niñip; ne Kaun gos ne ak abe niñip. Kaun ne cinop Kraiss Jisas bin bi ne miker dil, God nop agek, ageb rek ginigab. Kaun ne God nop sobok gilig gi mideb ak, God ginim, ag gos niñip ar ak nep sobok gilig gi mideb.

²⁸Cin nipin, God nop midmagil lipin bin bi okok, God ne cinop kod midek niñlig gi, tap ognap ke ma ginigab; mid tep ginigabin ar ak nep cinop ginigab. God ne birarik ped okok gos niñil agak rek, cinop, “Ñibi yip onimib,” agak.

²⁹Pen ar nibak nep, God bin bi ned niñjak okok, “Yad gen, kiri Ñi yad mideb rek lil, ninai nimam kisen ne koñai yib midenigal,” agak. ³⁰Nib ak, bin bi Ñi yad rek midenigal, agak bin bi okok, kirop, “Yip onimib,” agak. Bin bi, yip onimib, agak bin bi okok, kirop bin bi asiñ ma mideb agak. Bin bi kirop asiñ ma mideb agak okok, Ñi yad melik tep sek mideb rek, kiri ak rek nep midenigal, agak.

Krais cinop midmagil lil kod mid tep gip

³¹Pen God ne cinop nig gil di tep gip ak, bi an cinop gi timel ginigab? Bi alap cinop gi timel ginimij rek ma lip, mer yib! ³²God ne ma pirikil, Ñi ne ke ak cinop nen agil ag yokek apil kimak ak tap kib yib. Pen God cinop nig gak ak me, ne cinop di tep gil, tap tep tep nep cinop ak rek nep ñinigab. ³³Pen God ne cinop ag lip rek, bi an cinop minim kib agnigab? God ne ke gek asiñ ma mideb rek midobin ak, minim ma mideb, agak. ³⁴Nib ak, bi an cinop minim kib agnigab? Bi alap nib agnimij rek ma lip. Krais Jisas cinop nen agil, kimil warikil, am God ñinmagil yipid pis ken ar ne midil, cinop nen agil, Nap nop sobok gilig gi mideb.

³⁵Krais cinop midmagil yib lip ak me, bi an nop mer agil cinop tig asik ke linigab? Tap alap ke misenñ lil, cinop tig asik ke linimij rek ma lip.

Cinop miker ognap ginigab aka,
 koslam midenigabin aka,
 yuan kib lenigab aka,
 walij ma midenigab aka,
 gos par niñnigabin aka
 bi ognap cinop, Krais eip midebal, agil,
 cinop gi timel ginigal aka,
 ñag pak linigal aka,
 tap tari ginigab,
 Krais eip jim ñil nep midonigabin.

³⁶Minim nibak rek God Minim ñu kil tikil aglak,

“Nep eip midobin rek, per cinop niñil,
 kaj sipsip rek ñag pak lin, ag gos nipal,” aglak.

³⁷Nib ak, kimeb rek nab ak midobin ak pen cin bi cinop midmagil lil kimak ak Krais eip midil, tep gek niñlig gi nep midil, tap nib okok ma piriknigabin. ³⁸Ar nibak yad nipin, kimnigabin aka komij midenigabin, God cinop midmagil li nep midenigab niñil tap alap cinop tig asik ke linimij rek ma lip. God ejol ne okok, tap kilis sek seb kab ar alañ mideb okok, tap kal timel okok, tap miñi mideb okok, tap kisen midenigab okok, ³⁹tap ar okpel mideb okok, tap mok okpi mideb okok, tap tari tari mideb okok magilsek, tap alap cinop tig asik ke linimij rek ma lip. Bi Kib cin Krais Jisas mideb rek, God cinop midmagil lilig gi nep midenigab.

God gos ne ke niñil Isrel kai kirop dinig gak

9 ¹Minim agebin nibaul, yad Krais bi ne midebin rek, esek ma agebin. Kaun Siñ ak gos magil yad ageb, minim ageban nibak minim niñid

ageban, ageb. ²⁻³Pen ai mam sikop. Isrel bin bi ognap Kraiis nop ma dipal okok kisen minim kib niñil yur kib dinigal ak, yip yimig yib gip. Nib ak, yad gos par yib nipin. Midmagil yad per yur kib yib gip. Yad niñid nep agebin, kanib midobkop, yad ai mam yad okok kirop nen agil yur den, kiri pen komiñ amblap.

⁴Pen tari: God Isrel kai nep kiri ñi pai yad midelan, agil, melik tep ne kirop nep yomil, yad nibep akniñ ginigain, agil, minim kilis niñid kirop nep ag ñil, lo minim ne ak kirop nep ag ñil, kiri titi gil God sobok gep karip ak yipid gil sobok ginimel minim ak kirop nep ag ñil, yad titi gil bin bi kirop di tep ginim, minim tep ak kirop nep ag ñak. ⁵Isrel bin bi nised acik kiri Ebrahim, Aisak, Jekop bi okok me. Ebrahim, Aisak, Jekop ñi pai tikel, tik dam dapil gi damil, Isrel bin bi kirop tik dolak. Kigin nokim ak nep tik dam dapil gi damil, Kraiis nop bi yib tik dolak. Kraiis ne ke God midil, bin bi magilsek kod mideb. Kiri magilsek yib ne ak per agel ar amnanj.

⁶God Minim agak ak, agak rek nep gak. Isrel ñi pai tikel, tik dam dapil gi damil, tik dolak okok ognap Isrel bin bi yipid gil ma midebal. ⁷Ebrahim ñi pai tikel, tik dam dapil gi damil tik dolak okok ognap Ebrahim ñi pai ne yipid gil ma midebal. God Ebrahim nop agak, “Aisak ñi pai tikniñgab okok nep ñi pai ar nepe rek mideniñgal,” agak. ⁸Nib ak, Ebrahim ñi pai tikel, tik dam dapil gi damil, tik dolak okok ognap God ñi pai ne ma midebal. God minim kilis niñid agek Ebrahim ñi pai tik doniñgal ñi pai okok nep, kiri God ñi pai ne mideniñgal. ⁹God Ebrahim nop minim kilis niñid nibak agil agak, “Ñin yad ag linek ñin ak nep yad adik gi apen, bin nak Sera ñi alap tik doniñgab,” agak.

¹⁰Pen apis cin Rebeka ñi ne omal bi nokim nep tikak. Bi nibak based cin ak Aisak. ¹¹⁻¹²Pen God gos ne ke niñip rek ginigab. Bin bi an an ag linigain agenigab ak, ag linigab. Kiri tap tep ognap geniñgal ak niñil ma ag linigab. God gos ne ke niñip rek ginigab. Nib akniñ rek nep me, apis based cin Aisak Rebeka ber mal ñi tam ma tikrek won ak, God ne Rebeka nop agak, “Ñi nak ned tikniñgan ak, bi kib rek ma mideniñgab; ne ñi nak kisen ak nop wög gi ñiniñgab,” agak. Ñi kogi nab okok nep miderek nonim ma tik dowak ar ak nep, tap tep tap timel alap gerek niñil mer, God gos ne ke niñil nib agak. ¹³God Minim dai alap ñu kil tiklak ak, God minim agil agak, “Yad Jekop nop midmagil lil dipin pen Iso nop midmagil lil ma dipin,” agak.

God ne gip ak, yipid gil nep gip

¹⁴Nib ak, God yipid gil ma gip, agin? Mer! Ne yipid gil nep gip. ¹⁵God ne Mosis nop agak,

“Bin bi yimig niñniñgain okok kirop yimig niñniñgain.

Bin bi midmagil lil di tep ginigain okok

kirop midmagil lil di tep ginigain,” agak.

¹⁶Nib ak nipin, cini ke kilis gil gipin ak niñil cinop ma dinigab; cini ke kilis gil gos sek midobin ak niñil cinop ma dinigab. Ne ke yimig niñnigab bin bi okok nep dinigab.

¹⁷God Minim dai alap ñu kil tiklak ak, God minim agil Pero nop agak, “Yad gos niñen, bin bi karip lim tigoñ tigoñ midebal okok magilsek niñnigal, nak kiñ Ijip nib ak bi kib bi kilis yib pen yad God gen nak bi yokop rek midenigan. Nig genigab, kiri niñil, minim nibak ag amil apil gil yib yad ak agel karip lim tigoñ tigoñ magilsek amnigab. Ar nibak nep yad ke gen, nak Ijip kiñ mideban,” agak. ¹⁸Nib ak nipin, God gos ne ke niñip rek, bin bi ognap yimig niñnigab pen bin bi ognap kirop niñebir gek, gos timel kiri nipal ak kidil amnigab.

¹⁹Nibi ognap God gip nibak rek niñil agnigabim, “God ne nep gek, gos nibi ak kidil amib ak, tari ginig pen, mid tep ma gipim, agil, cinop minim kib agnigab? God ne ke, ‘Tap nib okok ginigab,’ agnigab ak, bi an ne pen, ‘Tap okok ma ginigab,’ agnigab?” agnigabim. ²⁰Nib agnigabim ak pen nibi bi kib an rek midil, God minim ne ak dai dinigabim?

Ar nibak rek, God Minim ak bi nak Aisaia ñu kil tikil agak, “Bi alap lim dil, tin cög alap gek, ‘Yip tari ginig nig gil gipan,’ agil pen ma agnigab. Mer yib!” agak. ²¹Bi tin cög ginig geb bi ak, ne gos ne ke niñip rek ginigab. Lim bad nokim alap tig gi rik dapil, tin tep tep ñin nokim nokim dagilep alap gi lil, tin yokop per per dagilep alap gi lil, ginigab. Ak minim ma mideb; gos ne ke. ²²⁻²³Nib aknib rek me, God gip. Ne bin bi gi timel gi midebal okok niñek, yirik yib gek, kirop ñag pak linimiñ rek lip ak pen, ne milik sek mideb ak niñil kilis ne mideb ak niñlan, agil, kirop kasek nig ma gip. God birarik ped okok gos ne ke niñil agak, bin bi yimig niñil di tep ginigain bin bi okok melik tep yad ak niñnimel, agak. Nib ak, bin bi nib okok melik tep yad ak niñnimel, agil, ne bin bi gi timel gi midebal okok gek, gos cibur timel kiri ak kidil amib. ²⁴Bin bi yimig niñil di tep ginigain, agak minim ak, cinop Juda bin bi abe, Juda bin bi mer okok abe, agak. ²⁵Minim ar nibak rek, God minim agak ognap bi nak Hosea God Minim dai alap ñu kil tikil agak,

“Bin bi yad ma mideligipal okok,

kirop ‘bin bi yad’ agnigain.

Pen bin bi midmagil ma löligipin okok,

kirop ‘bin bi midmagil yad’ agnigain.

Pen Hosea God Minim dai alap sek ñu kil tikil agak,

²⁶Ned ‘Bin bi yad ma midebim,’ agnek ak,

karip lim nokim nibak nep kirop

‘God per komiñ mideb ñi pai ne,’ agnigain,” agak.

²⁷Pen God Minim dai alap, bi God minim agep Aisaia minim bleble gil ageb,

“Isrel kai kab kilip ñig gol okok mideb rek
 koñai nep midenigal ak pen
 Bi Kib ne yokop sikol bad alap nep
 di komiñ yokniğab.

28 Tari ginig: Bi Kib ne kasek nep
 bin bi lim dai ar wagin aul midebal okok
 magilsek minim kib agil
 pis nep pen ñinigab,” agak.

29 Ginigab nibak, Aisaia ne ned God Minim dai alap ñu kil tikil agak,
 “Bi Kib ke kilis sek mideb ak,
 cinop ñi pai yokop bad alap nep ma kirig gipkop;
 Sodom Gomora bin bi kirop gak rek ak,
 cinop gipkop,” agak.

Isrel kai abe Jisas minim tep ak niñ dilañ; kanib tam nokim ak nep mideb

30 Nib ak, niñim! Juda bin bi mer okok, ned, mid tep gil God eip jim ñil midojin agil gos ak ma niñlak ak, pen miñi Jisas minim tep ak niñ del, God kirop asiñ ma mideb agek, ne eip jim ñil midebal. 31 Pen Isrel bin bi ned God lo minim ak dil, agip agip rek gin, aglak ak pen miñi ne eip jim ñil ma midebal. 32 Pen tari, God nop niñ dil mer, cin ke ar ognap gil, ne eip jim ñil midenigabin, agil, God ne kab tep lak ar ak amnin agel niñlig gi, tob kiri kab ar nibak li yokek ap yap pakpal. 33 Minim nibak rek, Aisaia ne God minim agak rek ñu kil tikil agak,
 “Niñim! Yad taun kib Saion kab alap len,
 bin bi tob kiri kab ar nibak li yokek ap yap paknigal;
 pen bin bi nop niñ dinigal okok,
 God nop niñil nabiñ ma dinigal,” agak.

Isrel bin bi, cin ke lo minim ar nibak kisen gin, agil gi damil ap yap paklak

10 1 Midemam yad okok. Gos kilis yip owip ak, God bin bi yad Isrel kai kirop di komiñ yokniñiñ, agil, nop per nep sobok gilig gi midebin. 2 Yad kiri gipal rek niñil nipin, cin God bin bi ne midojin, agil, kilis yib gipal ak pen gos niñ tep gil ma gipal. 3 “Krais kimak rek, God cinop, ‘Bin bi asiñ ma mideb yad, agniğab,’ agil gos ak niplap ak pen ar nibak niñ tep ma gil, gos kiri ke ar ak nep niñil aglak, ‘Cin lo ar ak gon amenigab ak, God bin bi tep ne midonigabin,’ aglak. Nib ak, lo minim ar nibak kisen gin, agil gi damil, kisen ap yap paklak. 4 Krais gak nibak, miñi lo ak kir gip. Nib ak me, bin bi an an Jisas minim tep ak niñ dinigal okok, God kirop magilsek, bin bi asiñ ma mideb yad, agniğab.

Bin bi karip lim tigoñ tigoñ magilsek komiñ amnimel rek lip

5 God Minim ak, Mosis minim ognap ñu kil tikil, lo minim dil asiñ ma mideb rek midenigal minim ar ak agil, Isrel kai kirop agak, “Lo minim

ak dil, ageb rek nep gil me, komiņ amnigabim,” agak. ⁶God Minim ak, Mosis minim ognap ņu kil tikil, Kraiis nop niņ dil asiņ ma mideb rek midenigal minim ar ak agil, Isrel kai kirop agak, “Nibi, ‘Bi an ar alaņ amnigab?’ ma agnimib,” agak. (Minim agak ak wagin ak me, kiri am seb kab ar alaņ siņak nib Kraiis nop poņ dil ma donigal.) ⁷Nib aknib rek nep, “Nibi, ‘Bi an cip kaun karip mideb mok okpi amnigab?’ ma agnimib,” agak. (Minim agak ak wagin ak me, kiri am cip kaun karip mideb mok okpi nib Kraiis nop poņ dil ma donigal.) ⁸Pen God Minim dai nibak, Mosis minim ar ognap tari tari ņu kil tikil Isrel kai kirop agak. Ne agak, “Minim magil nibak par okok ma mideb. Minim magil nibak midmagil nab kiri adaņ mideb per apim ar ak nep,” agak. Mosis ne Jisas minim tep, minim niņ dep nibak nep agak. Minim tep niņ dep nibak nep cin per nep ag ņibin me ak.

⁹Nib ak, God gek Jisas warikip, agil gos ak niņ midil, “Jisas ne Bi Kib yad,” miseņ agnigabim ak, God nibep bin bi asiņ ma mideb yad, agil, nibep di komiņ yoknigab. ¹⁰Pen tari, nibi gos midmagil nab nibi adaņ minim tep ne niņ dinigabim ak, God nibep bin bi asiņ ma mideb yad agnigab. Meg migan nibi minim tep nibak agil, bin bi okok miseņ ag ņinigabim ak, God nibep di komiņ yoknigab. ¹¹Ar nibak rek, Aisaia ne God Minim dai alap ņu kil tikil agak, “Bin bi nop niņ dinigal okok, God nop niņil nabiņ ma dinigal,” agak. ¹²Juda bin bi okok, Juda bin bi mer okok, ke ke ma midebal. Bi Kib ne bin bi okok nib okok nib magilsek Bi Kib nokim nep mideb. Bin bi okok nib okok nib an an nop sobok ginigal okok, kirop di tep yib ginigab. ¹³Ar nibak nep, bi nak Joel, God Minim dai alap ņu kil tikil agak, “Bin bi an an Bi Kib nop, yip di komiņ yokan, agil ag niņel, kirop di komiņ yoknigab,” agak. ¹⁴Pen kiri Bi Kib nop ma niņ dinigal ak, kiri nop titi gil sobok ginigal? Pen kiri Jisas minim tep ak peyiņ ma niņnigal ak, kiri titi gil minim tep nibak niņ dinigal? Pen bin bi ognap apil Jisas minim tep ar ak ma ag ņinigal ak, kiri titi gil minim nibak peyiņ niņnigal? ¹⁵Pen bin bi Kraiis Jisas niņ dipal okok kirop ma ag yoknigal ak, kiri titi gil amnigal? Ar nibak nep, Aisaia ne God Minim dai alap ņu kil tikil agak, “Bin bi minim tep dopal okok, kiri gi tep yib gipal,” agak.

¹⁶Pen Isrel bin bi Kraiis Jisas minim tep ak niņlak okok ognap ma niņ dilak. Minim ar nibak nep, Aisaia ne God Minim dai alap ņu kil tikil agak, “Yad minim tep nak ak kirop ag ņibin pen bi an niņ dip?” agak. ¹⁷Nib ak, bin bi ognap God minim ag nel, bin bi niņil minim nibak niņ dinigal. Pen God minim ag nel, niņ dinigal ak, Kraiis minim tep me ak. ¹⁸Pen Isrel kai minim nibak ma niņlak aka tari? Mer yib! Niņlak. Kiri ned niņlak ak me, Depid ne God Minim dai alap ņu kil tikil agak,

“Kiri karip lim tigoņ tigoņ magilsek amil,
minim nibak ag ņibal;

kiri minim ag ñel,

karip lim okok tigon tigon magilsek yib amib,” agak.

¹⁹Pen yad ag niñeb alap sek mideb: Isrel kai minim nibak niñil wagin ak ma niñlak aka tari? Mer yib! Wagin ak niñlak. Mosis ne God minim agak ak dil, God Minim dai alap ñu kil tikil agak,

“Yad bin bi saköl sek migan ognap kirop dil, di tep gen,

nibi Isrel bin bi kirop milik kal niñil,

God cinop rek nib ma gip, agil niñnigabim,” agak.

²⁰Aisaia ne God minim agak ak dil, God Minim dai alap ñu kil tikil misen yib agil agak,

“Bin bi yip niñin agil ma piyo nipal okok

yip piyo nipal;

kiri yip niñin agil ma ag nipal

pen yad ke kirop misen len yip nipal,” agak.

²¹Pen Isrel gipal rek, Aisaia ne God minim agak ak dil, God Minim dai alap ñu kil tikil agak,

“Yad per bi niñeb kiri rek midil,

‘Yip owim!’ apin pen yip ma opal.

Kiri aleb aleb ñil,

gos kiri ke nipal rek nep gipal,” agak.

God Isrel bin bi kirop pis nep ma kirig gip

11 ¹Nib ak, yad ag niñeb alap mideb: God Isrel bin bi okok kirop pis nep kirig gip aka? Mer yib! Kirop pis nep ma kirig gip. Yad Pol ak rek nep Isrel nib bi alap. Ebrahim tikek, tik damil, Benjamin nop tiklak; Benjamin pen tik dam dapil gak wagin ak, yad midebin.

²Pen God bin bi birarik nep niñil, bin bi yad midenimel, ag gos niñak bin bi okok kirop ma kirig gip. Kiri bi Ilaija nop kesim dil God Minim ñu kil tiklak ak bir nipim. Ilaija God nop sobok gil agak, ³“Isrel bin bi okok magilsek nep kirig gil, bi minim nak agep okok kirop ñag pak lil, kab kinañ gil tap pak nep sobok gep kab okok, pag jisipik masipik gi yokpal. Yad ausek nep midebin ak pen yip ak rek nep, ñag pak lin, agil, yik dad ajebal,” agak. ⁴Agek, God nop pen agak, “Bi yad konai yib nep sepen tausan rek (7,000) midebal okok, Bal god tom ak nop, ‘Bi kib cin,’ agil, nop ma sobok gipal,” agak.

⁵Nib ak rek, God bin bi yimig yib gip ak me, ne cinop bin bi Isrel yokop bad alap yimig niñil ag lek midobin. ⁶Cinop yimig niñil dip nibak, lo ar ak gonok aka tap ognap ke gonok niñil ma dip. Cinop yokop yimig niñil dip ag gos nipin ak, pen cin tap alap ke gon cinop dopkop, cin nig gos ma nipnop. ⁷Bin bi Isrel kilis yib gil piyo niñ damil ma dilak. God bin bi kirop dinigain agil ag lak bin bi okok nep dilak. God ne ke gek, bin bi ognap minim ne ak niñil ma niñlak.

⁸Ar nibak nep, Mosis God Minim dai alap ñu kil tikil agak,
 “God ne gek, kiri wisin kinil,
 udin jik jik gi midelak;
 ne gek, kirop udin kwoi gek,
 udin ma niñelak;
 ne gek, kirop saköl ñagek,
 minim peyig ma niñelak;
 nibak nep mid damil,
 miñi akniñ rek nep midebal,” agak.

⁹Pen Depid God Minim dai alap ñu kil tikil agak,
 “Kiri per tap kib ñibal ak,
 kirop waknañ gon rek di cici dinimiñ.
 Amnin ag gos niñnigal kanib nibak pis nep piliñ ginimiñ.
 Nib ak, kiri gi timel gipal ak, kiri pen dinimel.

¹⁰Udin kiri kwoi gek udin ma niñnimel.
 Miker kib apek per koslam kid pak dad ajenimel,” agak.

God Juda bin bi mer okok dip

¹¹Pen Isrel kai ap yap pakpal ak, pis nep ap yap ma pakpal. Kiri tap si tap timel gilak rek, God kirop kirig gil, Juda bin bi mer okok kirop dip. Dip nibak, “Isrel kai, ‘Cinop rek nig gil ma dip,’ agil niñlañ,” agil gip.

¹²Pen Isrel kai tap si tap timel gelak rek, bin bi kariñ lim tigoñ tigoñ tap tep yib dipal. God Isrel kai kirig gak rek, Juda bin bi mer okok tap tep yib dipal. Nib ak, God bin bi Isrel di komiñ yokniñgab ñin ak, bin bi ne okok magilsek tap tep tep yib dinigal.

¹³Yad miñi nibep Juda bin bi mer okok agebin. Kraiñ Jisas yip, “Juda bin bi mer okok kirop minim tep yad ag ñinimin,” agak ak me, nibep Juda bin bi mer okok Jisas minim tep ak ag ñi miden yip tep gip. ¹⁴Pen yad nibep Jisas minim tep ak ag ñen nipek, bin bi yad ke Isrel ognap niñil, “God kirop dip rek cinop ma dip,” agil nop apenimel ak, yip tep yib ginigab. ¹⁵God Isrel kai kirop kirig gak rek, Juda bin bi mer okok kirop, bin bi yad, agil, dip. Nib ak, kisen Isrel kai kirop dek, cip kimil kauyañ warikniñgal ak rek ginigab.

¹⁶Kiri bred dai alap God nop sobok gi ñenigal ak, bred magil magilsek God tap ne. Kiri agniñgal, “Mab olip wagiñ ak God mab wagiñ ne,” agniñgal ak, tam lil lek pak kid kid amniñgab ak abe God tap ne.

¹⁷Pen God ne mab olip lek kid ned nib okok sak yokil, nibep olip lek be okok nib rek dapil jim ñek, jim ñil midebim. Nib ak me, mab olip ned nib ak komiñ midil lim epi nib ñig ak dek, lek kisen nib ak mid tep gip. ¹⁸Nibi mab lek ned nib ak, lek yokop, agil gos ak ma niñnimib. Nibi niñnimib, nibi mab lek kisen nib ak ñig dil mab wagiñ ak ma ñibim; mab wagiñ epi ñig dil nibep mab lek añek ñib. ¹⁹Nibi agniñgabim, “God

ne, ‘Olip lek be okok nib dapil tig jim ñinim,’ agil, olip lek ned nib okok sak yokek, kau nibak dil midobin,” agnigabim. ²⁰Minim nibak niñid agnigabim ak pen niñ tep ginimib. Isrel kai Kraiss nop ma niñ del, kirop kirig gak; nibi pen Kraiss nop niñ dem, nibep dak. Pen nibi nabiñ dil, yib nibi ke agem ar ma amniñ. ²¹Tari ginig: God mab olip lek ned nib okok sak yokak rek, nibep ak rek nep ginimiñ rek lip.

²²God ne bi sain tep yib ak pen ne bi kilis yib rek mideb. Bin bi nop kirig gilak okok kirop bi kilis rek lil kirig gak. Pen nibep kapkap sain tikil, midmagil lil, dak. Nibi nig gil Kraiss nop niñ dilig gi midenigabim ak, ne nibep kapkap sain tikil, midmagil lilig gi midenigab. Pen Isrel kai kirop gak rek, cinop ak rek nep ginimiñ rek lip, agil, niñ tep ginimib. ²³Isrel bin bi nib okok kisen Kraiss nop niñ denigal ak, God kirop di pak jim ñinigab. God kirop di pak jim ñinimiñ rek lip. ²⁴Pen tari, nibep mab olip lek be okok nib dapil, mab olip yimib pak jim ñek midebim ak, olip lek yipid gil okok kauyañ pak jim ñinig, pak jim ñinigab.

Kisen Isrel bin bi magilsek kirop dinigab

²⁵Pen ai mam sikop. Yib nibi ke agem ar amniñ rek lip. Nib ak, minim ned ma niñoligipin alap nibep agnig gebin. Isrel bin bi koñai nep miñi udin kwoi rek midebal ak pen per nig ma ginigab. God Juda bin bi mer okok kirop dinigain, agil gos niñak, bin bi okok magilsek dinigab. ²⁶Bin bi nib okok di sakil, kisen Isrel bin bi kirop magilsek di komiñ yokniñab. Minim ar nibak rek, God minim agak ak dil God Minim dai alap ñu kil tikil aglak,
“God agak,

‘Jekop kigin yip kirig gilak okok
kirop di komiñ yokniñab Bi ak,
taun kib Saion nib onigab.

²⁷Yad kirop eip minim kilis niñid agnek rek,
tap si tap timel gipal gac ak lig gi yokniñgain,’ agak,” aglak.

²⁸Isrel kai Kraiss ma niñ dilak rek, kiri God kausal maual ne midebal. Pen nibi Kraiss niñ dil, miñ miñ gilig gi midebim. Pen God birarik nep Isrel kai nised acik kiri Ebrahim Aisak Jekop bi okok kirop minim kilis niñid agak ak niñil, God Isrel kai midmagil lilig gi nep mideb. ²⁹God ne tap tep alap ñil, kisen gos kisen nib niñil, tap tep nibak ma adik dinigab. Nib akniñ rek nep, God ne, ginigain, agil, minim kilis niñid agenigab, kisen gos kisen nib niñil, ke ma ginigab. Minim agniñab ak ma kirig ginigab. Agniñab rek nep ginigab.

³⁰Nibi ned God minim agak ak di yokoligipim pen kisen Isrel bin bi God minim ne kirig gel, nibep pen yimig niñil di tep gek, ne eip mid tep gipim. ³¹God nibep yimig niñil dak ak, Isrel bin bi niñel, miñik yapek, Kraiss minim tep ak di yoklak, pen kisen God kirop ak rek nep yimig niñil dinigab.

³²Nib ak nipin, Isrel bin bi okok abe, Juda bin bi mer okok abe, God minim ne ak di yoklak rek, God kirop magilsek niñebir kirig gek, kiri bi nagiman rek midil, tap si tap timel gi dam dam dad amel, kisen kirop yimig niñil dinigab.

God yib ne per agon ar amnañ

³³ Nib ak, yad nipin, God tap magilsek niñip;
 gos ne gos tep yib.
 God ne gos niñ kid yib niñ yikil,
 ar nibak ke yib gip.
 God ne gos niñil,
 tap nib nib ginigain, agil, gos tep niñip rek,
 bi alap gos tep aknib rek ma mideb.
 Cin God gos timid ne niñil,
 ne ke gip rek gin, agil, ma ginigabin!

³⁴ God Minim ak ñu kil tikil aglak,
 “Bin bi an, Bi Kib gos tep niñip rek ak niñip?
 Bin bi an, Bi Kib nop, ‘Nak nig gan, nig gan,’ agnigab?
³⁵ Pen bin bi an, tap tep alap God nop ñek, pen ñinimiñ?
 Mer yib! Bin bi alap nop nig ginimel rek ma lip,” aglak.

³⁶ Tari ginig: God ne tap okok magilsek gi lak;
 kilis ne nep tap nib okok magilsek mideb;
 tap nib okok magilsek God nop miñ miñ gilig gi midenimel.
 Nib ak, yib ne ak per per nep agon ar amnañ!
 Nib aknib rek tep.

God pis ar midobin, agil, nop tep ginimiñ ar ak nep gem amnimiñ

12 ¹Nib ak, ai mam sikop. God ne nibep yimig niñil dip rek, nibi pen tap God nop sobok gi ñibal rek, miñ goñ gos timid nibi ak, tap komiñ sek rek, tap siñ rek, God nop ñinimiñ. Tap damil, God nop sobok gi ñibal okok, tap timel timel okok ma ñibal. Tap tep tep, tap alap ma gip okok nep nop ñel me, ne miñ miñ gil dip. Nig aknib rek me, God ne miñ goñ gos timid cinop ke tap nop sobok gi ñibal rek dinimiñ, agil, nop niñ dilig gi midil, ageb ageb rek nep ginimiñ.

²Pen bin bi lim ar wagin aul gos niñil gipal nag ar ak rek ma ginimiñ. Pen God nop ag niñem, ne nibep gos tep ñek, gos timid midmagil nibi nab adañ kisen nib lil, bin bi ke kisen nib rek linimiñ. Nib ak, nibi niñniñgabiñ, cin titi gon, God nop tep ginimiñ. Nibi niñniñgabiñ kanib tari kanib tep yib; yipid gil nep ginigab ar ak niñniñgabiñ. Pen nibi nig gil niñ tep gil, nib aknib rek nep ginigabiñ. ³God yip yimig niñil dek, wög ne gipin. Nib ak, nibep magilsek agebin, cin bin bi kib, ag gos ma niñniñgabiñ. God ne niñ dep magil ak nibep ke nokim nokim ñib. Nib ak me, nibi nabiñ dil, cin tigeñ bin bi rek midobin, agil niñniñgabiñ.

⁴Cin nipin, cin magilsek mib goj nokim mideb ak pen dai dai ke ke korjai nep mideb. Dai okok wög ke ke mideb; tob ak wög ne ak ke gip, ñinmagil ak wög ne ak ke gip, udin ak wög ne ak ke gip. Nib ak, wagin ke ke mideb rek, wagin ke ke nep gipal.

⁵Nib ak rek, cin Kraiss pis ar midobin okok ak rek nep wög ke ke gipin ak pen bin bi kigin ne jim ñil nokim ak nep midobin. ⁶God cinop nokim nokim yimig niñil di tep gil, tap tep cinop ke ke ñib rek, ar nibak nep niñil ginigabin. God bin bi ognap tap tep ñil, minim yad bin bi okok ag ñinimin, agenigab ak, ne God niñ dep magil ñib rek ag ñinimiñ. ⁷God bin bi ognap tap tep ñil agnigab, bin bi okok wög ognap gi ñinimin, agenigab ak, bin bi okok wög ognap gi ñinimiñ. God bin bi ognap tap tep ñil agnigab, bin bi ñi pai bi okok minim tep ognap ag ñinimin, agenigab ak, bin bi ñi pai minim ag ñinimiñ. ⁸God bin bi ognap tap tep ñil agnigab, ai mam nak alap yirik gonimiñ ak, nop minim ag ñi tep gek, ne gos tep niñil miñ miñ ginimiñ, agenigab ak, ne aknib rek ginimiñ. God bin bi ognap tap tep ñil agnigab, bin bi okok mani tap okok ulep gip ak, kirop mani tap ognap ñinimin, agenigab ak, mani tap ognap abramek ñinimiñ. Bin bi ognap tap tep ñil agnigab, bin bi ognap kirop kod midenimin, agenigab ak, ne gos niñ tep gil kirop kod midenimiñ. Bin bi ognap tap tep ñil agnigab, bin bi ognap kirop yimig niñil di tep ginimin, agnigab ak, ne miñ miñ gilig gi yimig niñil di tep ginimiñ.

Bin bi okok kirop midmagil linimib

⁹“Bin bi okok kirop midmagil lipin,” agil, esek ma agnimib; kirop midmagil yib lil, di tep yib ginimib. Tap si tap timel gep magil ak nop kausal maual nibi rek milik kal niñnimib. Pen kilis gil nag tep ar ak nep di rib ginimib. ¹⁰Bin bi ai mam sikop pen pen midmagil lipal rek, nibi Kraiss pis ar midebim ak rek nep ai mam sikop pen pen midmagil linimib. Ai mam sikop nibi okok yib kirop agem ar amnimiñ; pen yib nibi ke agem ar ma amnimiñ. ¹¹Wög yirik marik ma ginimib; kilis gil ginimib. Bi Kib cin ak nop wög gobin agil, tep gek niñlig gi ginimib. ¹²Bi Kib cinop dinigab, agil, tep gek niñlig gi, nop kod midenimib. Nibep miker ognap onimiñ, kapkap sain rikil midenimib. God nop sobok gep ak ma kirig gil, per nep sobok gilig gi midenimib. ¹³Bin bi God pis ar midil, mani tap kiri ulep gonimiñ, kirop mani tap ognap nonim li ñinimib. Bin bi par okok nib apenimel, poñ dil kariñ nibi dad amnimib.

¹⁴Bin bi ognap nibep gi timel genimel ak, nibi pen, “God nop sobok gon kirop gi timel gañ,” agil ma sobok ginimib; “God nop sobok gon kirop gi tep gañ,” agil sobok ginimib. ¹⁵Bin bi ognap kiri miñ miñ gilig gi midenimel, nibi kirop eip miñ miñ gilig gi midenimib; pen bin bi ognap yim gep rek midenimel, nibi kirop eip yim gek niñlig gi midenimib. ¹⁶Bin bi yib mideb okok kirop di tep gin, bin bi yib ma mideb okok kirop

di tep ma gin agil, gos ak ma niñnimib. Kirop magilsek adip adip rek di tep ginimib. Cin bin bi yib mideb, agil, gos ak ma niñnimib. Bin bi yib ma mideb okok eip nab sakil midenimib. Cin nep niñ tep gipin, agil gos ak ma niñnimib.

¹⁷Pen bin bi ognap nibep niñel milik yapek, gi timel genimel ak, kirop pen ak rek nep gi timel ma ginimib. Bin bi okok niñel tep ginimiñ ar ak nep ginimib. ¹⁸Bin bi ognap eip pen pen gin, agil gos ak ma niñnimib. Bin bi okok magilsek eip kapkap jim ñil midojin, agil gos ak nep niñnimib. ¹⁹Pen bin bi tep yad okok. Bin bi ognap nibep gi timel genimel ak, kirop pen gi timel gin, agil, gos ak ma niñnimib. Ak God tap ne, agil niñnimib. Yad kirop pen abe gi timel gin, agil, God ne ke gos niñip rek ginigab. Mosis ne God minim agak ak dil, God Minim dai alap ñu kil tikil agak, “God ageb, ‘Nibep gi timel genimel ak, yad kirop pen abe gi timel ginigain; ak gos yad,’ ageb,” agak. ²⁰Nib ak, bi nak Solomon God Minim dai alap ñu kil tikil agak,

“Bin bi nibep ned gi timel gilak okok
kirop yuan lenimiñ ak, tap magil ñinimib;
kirop ñig nen genimiñ ak, ñig ñinimib.
Niğ genigabim ak, bi nibep ned gi timel gilak okok
nabic kirop ar alağ mab yineb yineb rek yokem yinek niñniğal,”
agak.

²¹Nib ak me, nibep gi timel genimel, kirop pen gi timel ma ginimib; kirop gi tep gem, ke sain gek amnimiñ.

Gapman kai agnimel rek ginimib

13 ¹Pen cin magilsek gapman agnimel rek niñin. Ke gos niñil, gapman ma mideb; God agek, gapman mideb. ²Nib ak, bin bi an gapman minim tib jueniğab, God agek gapman mideb minim ne ak abe tib juniğab. Bi nibak God nop minim kib agniğab. ³Bin bi gi tep ginigal okok, gapman bi kib okok jel gek ma piriğniğal; bin bi gi timel ginigal okok nep, gapman bi kib okok jel gek piriğniğal. Nib ak, gapman bi kib okok ma piriğjin, ag gos niñeniğabim ak, nibi mid tep ginimib niñil gapman bi kib okok, “Nibi gi tep gipim,” agniğal. ⁴Pen tari: God agek, gapman bi okok, wög gep bi ne rek midil, nibep kod midel me, nibi mid tep ginigabim. Pen nibi niñ tep gil, gi timel ma ginimib; gapman bi tu par kid di ajpal ak, yokop ma di ajpal. God agek, gapman bi okok, wög gep bi ne rek midil, bin bi okok gi timel geniğal ak, kirop dam minim kib agil, pen yur ñiniğal.

⁵Nib ak, pen yur dijin rek lip, agil, gapman minim ak kisen ma gin; God gapman niñebir ag lek, cinop kod midebal ak me, tari ginig gapman minim tib juin, agil, minim kirop kisen gil kapkap mid tep gin.

⁶Ar nibak nep me, takis ak rek nep ñin. God gapman bi okok kirop niñebir agek, gapman wög kiri nibak gil, pe dipal. ⁷Tap dai nibi tap tari

tari rek midenimiņ ak, dai magilsek pag dai junimib. Gapman takis ñeb ak, kirop takis ñinimib. Bin bi ognap takis ar ke ognap ñeb ak, kirop ak rek nep takis ñinimib. Bin bi minim kiri niņ dep okok, minim kirop niņ dinimib. Bin bi yib dap rannimel okok, yib kirop dap rannimib.

Pen pen midmagil linimib

⁸Tap dai nibi ognap midonimiņ, pis nep dai pag ju dinimib. Pen cin tap dai nokim alap mideb ak cin dai ak pag ju dipin, agil ma agnigabin; bin bi pen pen midmagil lep dai nibak agebin. Bin bi okok kirop midmagil linigabin ak, God lo minim ageb ageb rek nep ginigabin. ⁹God ne ke minim kilis agak ak, Mosis ne God Minim dai ognap ñu kil tikil agak, “Bin si bi si ma ginimib; cip ma ñag paknimib; tap si ma dinimib; bin bi ognap tap kiri okok tap cini rek midobkop, agil gos ma niņnimib,” agak. God minim kilis ognap sek agak. Pen God minim kilis tari tari agak ak minim wagin nokim ak nep mideb: “Nak ke midmagil lipan rek, bin bi ke nib okok kirop ak rek nep midmagil linimin.” ¹⁰Nibi bin bi ognap kirop midmagil linigabim ak, kirop gi timel ma ginigabim. Ar nibak nep, nibi bin bi midmagil linigabim ak, God lo minim ageb ageb ak magilsek ginigabim.

¹¹Ñin midobin nab nibaul niņ tep ginimib. Jisas nop niņ dil, kisen God (ne bin bi yad ke, agil,) cinop pis nep dam karip ne ar alaņ sijađ dad amnigab, ag gos niņoligipin. Pen mi ognap apil amnak, ñin nibak miñi ulep mideb. Nib ak me, tari ginig wisin kin saköl gi midebim? Warikil, gos niņlig gi midenimib. ¹²Tapin kislím nab midobin rek, karip tikniđ geb. Nib ak me, kiri tap tari tari kislím nab eyaņ rek ajil gi timel gi midebal ar ak kirig gil, Seten eip pen pen gep sior kilis, usajil bad kilis, tap melik sek God ñib okok di yimin. ¹³Nib ak, cin Jisas melik tep ne ar ak midobin, agil, gi tep gilig gi nep midenigabin. Pen tap koņai yib ñibil, ñig kilis ñib saköl ñagil, bin si bi si gil, abramek gil, pen pen gil, tap kiri tap cin rek midobkop agil, gipal okok, ma gin. ¹⁴Pen nibi Bi Kib Jisas Krais di walij rek yimil, midmagil acir nab cin adaņ gos gip ar ak titi gil ginigabin, agil gos ak ma niņnimib.

Asik mosik gipal okok kirop ma ag ginimib

14 ¹Bin bi ognap Krais Jisas nop niņ dipal ak pen niņ di kilis ma gil, gos omal nipal okok, “Kirop dil ag amil apil gon, gos niņ tep ginimel,” agil, ma ag ginimib; kiri Jisas Krais nop niņ dipal ak, bin bi cin, agil, di tep ginimib. ²Cin nipin, bin bi ognap Krais Jisas nop niņ di midil, tap okok abramek ñibal; pen bin bi ognap, Krais Jisas nop gos ar ar nep niņ dil, nop tep ma ginigab, agil, kaj kimin kobri tap okok bil gil, yokop tap magil bep nep ñibal. ³Pen bin bi tap abramek ñibal okok, bin bi tap bil gipal okok kirop ma ag junimel. Bin bi tap bil gipal okok, bin bi tap

abramek ñibal okok, God niŋek tap si tap timel gipal, agil, kirop ma ag ginimel. Tari ginig: God bin bi nib okok kirop dek, bin bi ne midebal. ⁴Bi wög gep alap bi kib ne nop wög ognap ginigab, nak niñil, gi tep gipan aka gi tep ma gipan, agil ma agniŋan. Bi kib ne ke niñil, gi tep gipan aka gi tep ma gipan, agniŋab. Pen ne gi tep ginigab. Bi Kib ne ke nop gi ñek, ne tep ginimiŋ rek lip.

⁵Pen bin bi ognap niñel, ñin alap God ñin kib ne rek lip, ñin alap ñin yokop rek lip. Pen bin bi ognap niñel, ñin alap God ñin kib ne rek ma lip, ñin magilsek ñin ke ke rek ma mideb. Nib ak, nibi ke ke midebim rek, gos nibi tep nipim ar nibak niñil gem amnimiŋ.

⁶Ñin alap God ñin kib ne rek lip, agil nipal okok, Bi Kib nop gos niñil me nig gil gos nipal. Pen bin bi kaj kimin kobri tap okok ñibal okok, God nop tep agil ñibal. Bin bi asik mosik gi tep gil, tap ognap nep ñibal okok ak rek nep, God nop tep agil ñibal.

⁷Cin komiŋ midil, cin ke ausek midobin, agil gos ak ma niñin. Kimniŋ ginigabin ak, cin ke ausek midil kimniŋabin, agil gos ak ma niñin. ⁸Tari ginig: cin komiŋ midil, bin bi Bi Kib yib agel ar amnaŋ, agil, gos ak nep niñil midoniŋabin. Kimniŋ ginigabin ak, bin bi Bi Kib yib agel ar amnaŋ, agil, gos ak nep niñil kimniŋabin. Nib ak, komiŋ mideniŋabin aka kimniŋabin, cin Bi Kib bin bi wög gep ne midobin. ⁹Ar nibak nep, Kraiss ne kimil warikak. Nib ak me, cin komiŋ midobin okok abe, bin bi bir kimbak okok abe, cin magilsek Bi Kib bin bi ne midobin.

¹⁰Nib ak, nibi tari ginig ai mam Kraiss pis ar midebal ognap kirop, nig gipim, nig gipim, agil minim ag gipim? Pen nibi tari ginig ai mam Kraiss pis ar midebal ognap kirop niñem, kiri bin bi yokop rek lip. Niñ tep ginimib: cin magilsek God udiŋ yirik ar ne ak midon, cinop minim kib agniŋab. ¹¹Aisaia God Minim dai alap ñu kil tikil agak,

“Bi Kib ageb, ‘Yad niñid yib agebin,
kisen bin bi okok magilsek yip niñil,
nabiŋ dil, kogim yimil,

“God ne nokim Bi Kib mideb,” agniŋal,’ ageb,” agak.

¹²Nib ak, niñim. Cin nokim nokim midobin rek, God cinop magilsek ag niñek, cin komiŋ midil tap tari tari gipin okok ag ñil, ti ginig nig gipin agil agniŋabin.

Ai mam Kraiss pis ken midebal ognap kirop gos niñnimib

¹³Nib ak, ai mam Kraiss pis ar midebal ognap kirop, nig gipim, nig gipim, agil minim ag gipim ak kiriŋ ginimib. Nibi gos niñil, yad gen ai mam Kraiss pis ar mideb alap sidol gil, kaniŋ koslam ajep rek ak amil, yap pakil gi timel ginigab, agil, kapkap midil, ar nibak nep gem amnimiŋ. ¹⁴Bi Kib Jisas bi ne midebin rek, gos yad ak niñ tep gipin, tap bil gep ognap ma mideb. Bin bi ognap gos kiri ke niñil, tap bil gipal. Pen tap

nibak ñibon, God niñek tep ma ginigab, agil bil ginigal ak, tap nibak ma ñiñnimel. ¹⁵Pen nibi, ai mam Jisas kirop nen agil kimak nib okok kirop midmagil ma lil, tap kiri asik mosik gipal okok abramek ñibem, kiri gos par niñil ap yap paknimel rek lip. Ar nibak gi timel ginigabim. ¹⁶Nibi ke niñil, ar ognap ginimib rek linigab ak pen bin bi ognap nig ginigabim ak niñil agnigal, “Krais pis ar midobin apal ak pen kiri niñebir tap si tap timel gebal ak me, cin nipin, Jisas minim tep ne minim niñ dep apal ak esek apal,” agnigal. ¹⁷Tari ginig: God ne kiñ cin mideb minim ar nibak agonigabin ak, tap ñiñeb ñig ñiñeb minim nibak ma agnigabin; gi tep gep minim ar ak nep agnigabin; kapkap sain tik midep minim ar ak nep agnigabin; miñ miñ gilig gi midep minim ar ak nep agnigabin. Tap tep nib okok Kaun Siñ ne ñek dinigabin. ¹⁸Cin Krais nop niñ dil nig gilig gonigabin ak, God niñek tep ginigab; bin bi okok niñil, gi tep gipal, agnigal.

¹⁹Cin titi gil ai mam eip kapkap jim ñil midil, cin magilsek Krais minim tep ne ak niñ di kilis gin, agil, kanib nibak nep kilis gilig gi kisen ginimib. ²⁰Tap magil ognap bil ma gep. Pen bi alap gos gos lil tap okok abramek ñibek, Krais nop niñ dip bin bi alap niñil, sidol gil, Krais niñ dip ak kirig gil ap yap paknigab ak, bi abramek ñiñnigab bi nibak nop gi timel ginigab. Tap magil ñibil, God wög ne gi timel ginigab. Nibi nig aknib rek ma ginimib. ²¹Nib ak, cin ñibon ai mam alap ap yap paknimiñ rek lip, ag gos niñnigabim ak, kaj yipil okok kirig gil, ñig wain okok kirig gil, tap okok kirig gil ginigabim ak tep. Tari gon ai mam alap ap yap paknimiñ rek lip, ag gos niñnigabim ak, ai mam kirop nen agil, nig ma ginimib.

²²Yad tap ñiñeb ma ñiñeb minim agesin ak, nibi tari gos nipim ak, nibi ke God eip. God cinop gos tep ñib rek niñil gi damil, ai mam ognap kirop ma tau ñinigabin ak, miñ miñ gilig gi midenigabin. ²³Pen tap ognap gos par lilig gi ñiñnigabin ak, minim midenigab. Tari ginig: nig genigabin, God nop tep ginimiñ, ag gos niñil ma ñiñnigabin; nop tep ginimiñ aka tep ma ginimiñ, ag gos niñil ñiñnigabin. Cin nig gil rek abramek genigabin ak, tap si tap timel ginigabin.

Bin bi ognap mid tep ginimel rek ar ak nep gos niñin

15 ¹Cin bin bi Krais nop niñ di kilis gi midobin okok, cinop ke tep ginigab ar ak niñil ma gin. ²Bin bi Krais nop niñ di kilis ma gipal okok, nop niñ di kilis ginimel, agil, gos ar ak niñil giñin. Cin ke tep ginigab ak tap kib mer; pen bin bi ognap, Krais nop niñ di kilis ginigal aka nop niñ di kilis ma ginigal ak tap kib. ³Krais ak rek nep, ke tep gak ar ak ma gak. Krais ne Nap nop minim agak ognap, Depid ne God Minim dai alap ñu kil tikil agak, “Nep ag jupal ak miñi yip ak rek nep ag juebal,” agak. ⁴Kiri niñ tep ginimel, agil, God ne gek niñil bi ned nib

okok God Minim ak ñu kil tiklak. Cïn God Minim nibak udin li niñil, minim tep nibak niñ dil, Jisas Kraiss niñ di kilis gil, kilis gil gi tep gil, kapkap miñ miñ gilig gi gos sek midenigabin. Ar nibak nep God ne gek, God Minim nibak ñu kil tiklak. ⁵God ne gek, nibi Jisas Kraiss niñ di kilis gil, kilis gil gi tep gil, kapkap miñ miñ gilig gi gos sek midenigabim. Pen Kraiss Jisas gak rek niñil nibak rek gin, agil, nop nig gil kisen gil, God ne gek, nibi gos ar nokim niñil jim ñil midil, ginimib. ⁶Nibi nig gil, gos nokim nep, meg migan nokim adip adip ak nep, Bi Kib cin Jisas Kraiss Nap yib ne ak agem ar amnimij.

God Isrel bin bi mer okok kirop ak rek nep yimig niñip

⁷Gos niñ tep ma gipek ñin ak, Kraiss nibep yimig niñil di tep gek, bin bi ne midebim ak, nibi ke kapkap pen pen yimig niñil, di tep gil, midmagil lilig gi midem, bin bi ognap niñil God yib ne agel ar amnigab. ⁸God birarik nep Juda kai nised acik kiri okok kirop minim kilis niñid agak ak, agak rek nep ginigab ak niñnimel, agil, Kraiss ne Juda kai kirop nen agil owak. ⁹Nib ak, Juda bin bi mer okok, God ne cinop yimig yib niñip, agil, yib nop agel ar amnañ, agil, Kraiss owak. Kraiss ned Nap God nop minim agak rek, Depid God Minim dai ognap ñu kil tikil agak,

“Nib ak, yad Juda bin bi mer nab okok midil,
kimep agil, yib nak ak agen ar amnigab,’ agip,” agak.

¹⁰Minim alap Mosis God Minim dai alap ñu kil tikil agak,

“Nibi Juda bin bi mer okok, God bin bi ne eip
pak jim ñil, miñ miñ ginimib,” agak.

¹¹Pen minim alap Depid God Minim dai alap ñu kil tikil agak,

“Nibi Juda bin bi mer okok magilsek
Bi Kib yib ne agem ar amnañ.

Nibi bin bi karip lim ke tigoñ tigoñ magilsek

kimep aglig gi, yib nop agem ar i oklañ amnañ,” agak.

¹²Pen Aisaia ak rek nep God Minim dai alap ñu kil tikil agak,

“Bi Jesi tikek tik damil tik donigal bi alap apil,
bin bi karip lim ke ke midebal okok magilsek kod midenigab.

Juda bin bi mer okok, Bi nibak nep gos niñil,
gos sek midenigal,” agak.

¹³God ne gak ak niñil, gos sek midobin. God gek, nibi nop niñ di kilis gil, miñ miñ gilig gi, kapkap cibur sain sain gilig gi midenimib. Nig gilig gi midem, Kaun Siñ ne kilis sek gos timid midmagil nab nibep adañ apil gek, nibi gos sek nep midenigabim.

Pol tari ginig minim kilis agil mij ñu kil tikak?

¹⁴Pen ai mam sikop. Gos yad niñebin nibi bin bi tep yib; nag ar tari gem God nop tep ginigab ak niñ tep gipim; nibi ai mam nibi okok God

Minim tep ak pen pen ag ñi tep ginimib rek lip. ¹⁵Pen nibep mij ñu kil tikebin nibaul, minim kilis rek ognap agebin. God yip yimig niñil, di tep gil, wög gep bi ne ag lak ak me, yad nibep minim kilis nibak, kauyan agen niñ tep gim, agil agebin. ¹⁶God yip ag lek, yad Krai Jisas wög gep bi ne midil, Juda bin bi mer okok kirop gi ñil, God minim tep ak kirop ag ñibin. Yad God minim tep ag ñibin ak, yad God nop tap sobok gep bi rek midil, minim tep ne ag ñibin. Nig gen, Juda bin bi mer okok, God nop tap sobok gi ñibal tap tep yib tap ma gip rek lel, God nop tep ginigab. Kaun Siñ ne gek, kiri bin bi ke komiñ tep rek lel, God kirop miñ miñ gil dinigab.

¹⁷Krais Jisas eip jim ñil midebin ak me, yip tep gek niñlig gi, God nop wög gilig gi midebin. ¹⁸⁻¹⁹Krais gek yad nop wög gil, yad wög tari tari gipin ak nep agniñgain. Yad Juda bin bi mer okok kirop Krai minim tep ak ag ñi ajenek niñlig gi, Kaun tap ma gep rek ognap gek niñlig gi, Juda bin bi mer okok niñil, God minim ak dipal. Yad kariñ lim Jerusalem wagin gil, Krai minim tep ak magilsek yipid gil nep kanib par yib ag ñi tep gi dam dam kariñ lim Ilirikam amil, adik gi onek. ²⁰Gos yad per nipin ak, bin bi Krai minim ne ned ma nipal kariñ lim okok nep amil ag ñinim, agil gos nipin. Bi Krai minim ag ñeb ognap ned amil sap bir piñil gipal ar ak kariñ ginim, agil ma gos nipin. ²¹Aisaia ne God Minim dai alap ñu kil tikil agak,
 “Kirop minim tep ne ma ag ñibal
 pen kiri niññigal.
 Bin bi minim tep ne peyig ma nipal okok,
 kiri niñil niñ tep ginigal,” agak.

Pol taun kib Rom amnin, agak

²²⁻²³Nib ak, mi koñai yib nep, kariñ lim siñ aul ag ñi aj aj, taun kib nibi Rom amnim agöligipin ak pen ninim rek ma lak. Pen miñi kariñ lim tigoñ siñ aul wög ginim rek ma lip niñil yad nibep niñniñ ninigain. ²⁴Yokop ulep mideb, kariñ lim Spen amniñ gebin. Gos yad nipin ak, am nibep eip sikol magil alap kin miden tep gek niñlig gi, kisen nibi yip dam Spen kanib tam ak yoknimib, ag gos niñebin. ²⁵⁻²⁶Pen Masedonia Propins bin bi abe, Akaia Propins bin bi abe, Jerusalem bin bi Krai pis ken midil mani tap kiri ma mideb okok, kirop mani tap kiri okok abramek ñibal ak, miñi kirop ñinim, agil ninigain. ²⁷Gos kiri ke niñil gipal nibak, gi tep gipal. Juda bin bi Krai minim tep ak dam, Juda bin bi mer okok kirop ag ñibal rek, God mani tap kirop ñib okok ognap Juda bin bi kirop pen ninigal ak tep.

²⁸Pen mani yip ñibal nibak magilsek dam Jerusalem bi okok ñil, Spen kanib ak amil, nibi midebin siñak ninigain. ²⁹Ñin nibak apil nibep eip kin miden, Krai gos tep ne cinop ñek, nibi nop niñ di cici lil miñ miñ yib ginigabim.

³⁰Ai mam yad okok. Bi Kib Jisas Kraiss pis ar midebim ak, God Kaun nab nibep adanj midil nibep midmagil lep magil ak nib rek, yip ag gos niñil, God nop sobok gilig gi nep midenimib. ³¹God nop sobok gilig gi midenimib, yad Jerusalem amniñ gil, karip lim Judia amen, Judia bin bi Kraiss nop ma niñ dipal okok yip gi timel genimel, God ne yip di komiñ yokniñ. Pen God nop sobok gilig gi midenimib, yad Jerusalem amjakil, Kraiss bin bi ne okok kirop tap tari tari gi niñigain ak gen, kirop tep gek niñlig gi, eip jim niñ midojin. ³²Nib ak, God yip yau agonimiñ, nibi midebim siñak amil, won alap kin miden tep gek niñlig gi, nibep eip midenigain.

³³God nibep magilsek kod midek niñlig gi, kapkap jim niñ midil mid tep ginimib. Nib aknib rek tep.

Pol, “Nibi midebim?” agak

16 ¹Pen ai cin Pibi, Senkria taun siñak cöc wög gip bin ak, neb. Ne bin tep yib. Nibi midebim siñak amjakek, nop di tep ginimib.

²Yip tep ginigab ak, ne midebim siñak amjakek, nibi Bi Kib niñ dipim rek, Bi Kib bin bi ne pen pen di tep gipal ak rek, nop di tep ginimib. Nop tap ognap ma midonimiñ, abramek niñimib. Ne bin bi okok koñai nep kirop di tep gil, yip abe di tep gil gip.

³Pen bin Prisila abe, nigmil Akwila abe, Kraiss nop wög jim niñ goligipin ber mal kirop agnimib, “Pol nirep ber mal, ‘Midebir?’ agip,” agnimib. ⁴Ned yip ñag pak linig gelak, ber tep yad omal midil, yip di kasin girek. Pen cirop ke ñag pak linimel, agil gos ak ma niñil, nig ger, yip tep gil, Juda bin bi mer karip lim ke par okok ag ñen Kraiss Jisas niñ dipal okok kirop abe tep gip.

⁵Pen bin bi Kraiss Jisas niñ dipal karip kirop ber ak apil mogim gipal okok kirop ak rek nep agnimib, “Pol nibep, ‘Midebim?’ agip,” agnimib.

Mam midmagil yad Epinitas nop agnimib, “Pol nep, ‘Mideban?’ agip,” agnimib. Esia Propins siñak, Kraiss nop ned dak bi me nibak.

⁶Bin Maria nibep kilis yib gil wög gi niñligip ak nop agnimib, “Pol nep, ‘Mideban?’ agip,” agnimib.

⁷Pen bi tidig yad niñeb rek, Adronaikas abe, Junias abe, kirop mal agnimib, “Pol nirep mal, ‘Midebir?’ agip,” agnimib. Kiri mal Kraiss nop ned niñ direk, yad kisen niñ dinek. Yip miñ lilak rek, kirop mal ak rek nep miñ lel, jim niñ midoligipin. Pen bi Jisas minim dad ameb okok, bi nib omal kirop niñ tep yib gipal.

⁸Mam midmagil yad Ampletas, Kraiss nop cig tep gip bi nibak, nop agnimib, “Pol nep, ‘Mideban?’ agip,” agnimib.

⁹Mam Urbanis nop agnimib, “Pol nep, ‘Mideban?’ agip,” agnimib. Mam nibak yad eip Kraiss nop wög jim niñ goligipir. Mam tep

- Stakis nop ak rek nep agnimib, “Pol nep, ‘Mideban?’ agip,” agnimib.
- ¹⁰Apeles, miker apek, Kraiss nop niŋ di wös gil mid tep gip bi ak, nop agnimib, “Pol nep, ‘Mideban?’ agip,” agnimib.
- Bin bi Aristobyulas karip kin midebal okok kirop agnimib, “Pol nibep, ‘Midebim?’ agip,” agnimib.
- ¹¹Bi tidig yad niŋeb Herodion nop agnimib, “Pol nep, ‘Mideban?’ agip,” agnimib.
- Bin bi Nasisas karip ak kin midil, Bi Kib niŋ dipal okok kirop agnimib, “Pol nibep, ‘Midebim?’ agip,” agnimib.
- ¹²Bin Traipina abe Traiposa abe, Bi Kib nop niŋ dilig gi, nop wög gipir bin nib omal kirop agnimib, “Pol nirep mal, ‘Midebir?’ agip,” agnimib.
- Ai tep yad Persis, Bi Kib nop niŋ dilig gi, nop wög kilis gip bin nibak nop ak rek nep, “Pol nep, ‘Mideban?’ agip,” agnimib.
- ¹³Bi Rupas, Kraiss nop wög kilis gil gip ak, nop agnimib, “Pol nep, ‘Mideban?’ agip,” agnimib. Nonim ne ak, ami yad rek lip ak, nop ak rek nep agnimib, “Pol nep, ‘Mideban?’ agip,” agnimib.
- ¹⁴Asinkritas, Pligon, Hermes, Patrobas, Hermas, nimam sikop kiri eip midebal okok abe kirop magilsek, “Pol nibep, ‘Midebim?’ agip,” agnimib.
- ¹⁵Pilologas, Julia, Nereus, Nereus ninai ne Olimpas, Kraiss bin bi ne kiri eip midebal okok magilsek, “Pol nibep, ‘Midebim?’ agip,” agnimib.
- ¹⁶Nibi Bi Kib nop niŋ dipim rek, pen pen ag wasu dilig gi, mikem bom siloknimib.
- Kraiss bin bi ne siŋ aul, Kraiss nop sobok ginig cöc ke ke mogim gipal okok nibep, “Midebim?” agebal.

Minim esek agebal okok ma dinimib

¹⁷Ai mam tep yad okok, niŋ tep ginimib. Bin bi ognap minim okok nib okok nib dapil, bin bi Kraiss pis ar midebal okok kirop ag ñel ñel, gos tep ned niŋlak ar ak kirig gil, minim esek apal nibak dil, asik ke ke lipal. Nibep nib aknib rek nep ginimij rek lip ak, minim esek agenimel ak ma dinimib. ¹⁸Bin bi nig gipal okok, Bi Kib cin Kraiss nop wög ak gin, agil gos ak niŋil, ma gipal; kirop ke tep gip ar ak nep gos niŋil, gipal. Kiri minim sain sain rek, bin bi yib dap raneb minim ak nep aglig aglig gi midel niŋlig gi, bin bi niŋ tep ma gipal okok minim esek kiri niŋ dil sidol gipal. ¹⁹Nibi pen God minim tep ak di tep gil, ageb rek gipim, bin bi okok magilsek nipal ak, yip tep yib gip. Tap tari God udiŋ yirik ne tep ginimij ak, nibi bin bi gos niŋeb rek midil, tap tari God udiŋ yirik ne tap si tap timel rek midonimij ak, nibi bin bi gos saköl rek midenimib ak, yip tep ginigab.

²⁰Maṅ mīdeb, God bin bi kod mid tep gip ak, ne Seten nop di talak mok nibep okok lek, kilis ne ma midenigab.

Yad God nop sobok gebin, Bi Kib cin Jisas nibep yimig niṅil di tep gek niṅlig gi, nibi mid tep ginimib.

²¹Bi yad eip wōg jim ñil gipir, Timoti, nibep ageb, “Mīdebim?” ageb. Bi tidig niṅeb yad okok Lusias, Jeson, Sosipata ak rek nep nibep, “Mīdebim?” agebal.

²²Pen yad bi Tetias, Pol agek mij ñu kil tikebin aul, ak rek nep nibi Rom kai Krai pis ar mīdebim okok nibep, “Mīdebim?” agebin.

²³Bi Gaias, yip Pol dam kariṅ ne ak lil, kod mid tep gip ak, nibep, “Mīdebim?” ageb. Bi nibak nep Krai pis ar mīdebal bin bi okok agek kariṅ ne ak amil mogim gipal, kirop di tep gil mīdeb.

Pen bi kuskus pe ñeb Erastas abe, mam cin Kwotas abe, ak rek nep nibep, “Mīdebim?” agebir.

²⁴Yad God nop sobok gebin, Bi Kib cin Jisas Krai nibep magilsek yimig niṅil di tep gek niṅlig gi, nibi mid tep ginimib. Nib akniṅ rek tep!

²⁵⁻²⁶Pen God yib ne agon ar amnaṅ. Ne nep me nibep kod mīdek niṅlig gi, nop cig tep gil midenimib rek lip. Jisas minim tep nibak ned we gil midoligip ak pen miñi, bi God minim agep okok God Minim ñu kil tiklak wagin ak miseṅ lek, yad minim tep nibak bin bi okok kirop per ag ñibin. God nep agek me, bin bi kariṅ lim ke tiṅoṅ tiṅoṅ magilsek ag ñon, nop niṅ dil ageb rek ginimel.

²⁷God nokim gos tep gos kilis gil niṅip ak, Jisas Krai nop cinop nen agil ag yokek owak rek, yib ne per nep per nep agon ar amnaṅ. Nib akniṅ rek tep.